

# CBETA電子佛典集成

---

CBETA Chinese Electronic Tripitaka Collection  
ebook

X31n0609

## 法華經大意

明 無相說

中華電子佛典協會



# 目次

- [編輯說明](#)
- [章節目次](#)
  - [No. \\_609- A 法華大意序](#)
  - [No. \\_609- B 法華大意開經敘啟](#)
  - [經題](#)
  - [譯者](#)
  - [序品第一](#)
  - [方便品第二](#)
  - [譬喻品第三](#)
  - [信解品第四](#)
  - [藥草喻品第五](#)
  - [授記品第六](#)
  - [化城喻品第七](#)
  - [五百弟子受記品第八](#)
  - [授學無學人記品第九](#)
  - [法師品第十](#)
  - [見寶塔品第十一](#)
  - [提婆達多品第十二](#)
  - [持品第十三](#)
  - [安樂行品第十四](#)
  - [從地湧出品第十五](#)
  - [如來壽量品第十六](#)
  - [分別功德品第十七](#)
  - [隨喜功德品第十八](#)
  - [法師功德品第十九](#)
  - [當不輕品第二十](#)
  - [如來神力品第二十一](#)
  - [囑累品第二十二](#)
  - [藥王菩薩本事品第二十三](#)
  - [妙音菩薩品第二十四](#)
  - [觀世音菩薩普門品第二十五](#)
  - [陀羅尼品第二十六](#)
  - [妙莊嚴王本事品第二十七](#)
  - [普賢菩薩勸發品第二十八](#)

- [附文](#)
  - [天池沙門法聚頌](#)
  - [陳白沙寄太虛上人一首](#)
  - [考誌](#)
- [No. 609-C 法華大意後序](#)
- [No. 609-D 重刻太虛禪師法華大意跋](#)
- [卷目次](#)
  - 1.
  - 2
  - 3.
- [贊助資訊](#)

## 編輯說明

- 本電子書以「CBETA 電子佛典集成 Version 2023. Q1」為資料來源。
- 漢字呈現以 Unicode 3.0 為基礎，不在此範圍的字則採用組字式表達。
- 梵文悉曇字及蘭札字均採用羅馬轉寫字，如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題，歡迎來函 [service@cbeta.org](mailto:service@cbeta.org) 回報。
- 版權所有，歡迎自由流通，但禁止營利使用。

## No. 609-A 法華大意序

法華大意廼廣陵大虛相師談經結案之語也。其所謂大意者。述諸佛之本懷。顯眾生之妙性。會偏圓之一致。廓宗說之通途。蓋以一大事因緣。愚小莫能頓契。諸法之實相。深妙難以言宣。故大覺初生。輒露真機於指顧。法華後唱。全彰妙體於白毫。眇目難窺。微猷曷隱。然則啟方便於九部。開實智於三乘者。特以知音遼曠。未遇當機耳。若夫潛通秘鍵。妙叶玄樞。則曲唱傍提。無非勝行。塵緣剎境。等一妙心。是故舉手低頭。均蒙印記。譬猶都會大城。隨得一門而入。則八達皆通衢矣。惟師衣珠不昧。寶所親登。既闡義以發金文。復徵心而提如意。奪妙解於思惟之域。洞玄旨於威音以前。我執既忘。妙圓斯應。是則開塔戶於舉指。頓見古佛全身。觀龍女之獻珠。疾往無垢世界。河沙之界不隔。塵墨之劫匪遙。入無量義三昧。坐不思議道場。靈山一會。儼然未散。斯言信不誣矣。嘉靖丁巳歲孟冬天池沙門法聚謹序

## No. 609-B 法華大意開經敘啟

夫妙法蓮華經者。十方諸佛之極證。一切菩薩之真行。六道含靈之所迷。眾子不識之甚謗。然謗也迷也行也證也有四之不同。本也體也性也理也無四之不一。以四之皆一。故東方有聖人生。其道同。其體同。其言行行藏教化。乃至纖悉云為。無不同也。南北方。上下方。盡空有二界。有聖人生。其道同。其體同。其言行行藏教化。纖悉云為。無不同也。以四之不同。故古時有異端出。其言不一。其好惡不一。乃至憂患恐懼忿懣取舍。皆不一也。今時未來時。盡世代萬變有異端出。其言不一。其好惡不一。乃至憂患恐懼忿懣取舍。皆不一也。以不一故。車不同軌。書不同文。烏得大道不生謗而甚疑。所以不難於先覺。難於後學也。以同一故。天常同覆。地常同載。未嘗大道不同行而極明。所以不難於後學。難於先覺也。難於先覺。故先覺明道。克苦修行。如雪山六年。少林九載。皇皇如喪家之犬。汲汲如懷渴之鹿。或解人之惑而作論。或洗人之非而上書。或為道而戮身。或扶道而去首。或大辯而策有萬言。或深隱而言無一發。甚至於奴之狗之草之芥之。為一言之不明也。極至於割之屠之囚之賁之。為半偈而可學也。嗚呼。所以難於先覺者此。不難於後學。故後學有大聖人之經明如日。有大賢人之註朗若星。解惑有高僧至論。破疑有大士宏辯。指入道之徑路。弦如也。開見性之大門。豁如也。肯信則直下成佛。皆居無垢世界。

肯行則即俗超凡。皆證清淨法身。況今夙承善力。際遇大明。車同軌而書同文。天同覆而地同載。異端息而大道明。謗毀消而聖教顯。欲明斯明。日中觀手掌。肯入即入。家裏拜爺娘。何艱險之有。但不肯入。實容易而不難。但不肯信。今日肯信。今日入佛之界。吾曰不難於後學者此。相質實愚魯。幸入誠明之室。學固淺狹。早逢覺悟之師。既蒙尊眾以推行。敢不罄懷而闡演。伏惟尊眾。念吾佛大聖人欲正法久住之心。各各起難遭之想。蓋百年如電影。萬物人最靈。人而不明此道。百年後。雖欲人身。其可得乎。生生之理。乾坤固無止息之時。必得人身。恐造化不能專制。惟願眾悉一心回向。聽說偈曰。妙法蓮華七卷經。此心暫離便難明。愛憎取舍千分別。人我是非萬不平。大海本非魚障礙。長空元任鶴飛鳴。今朝良遇真如教。惟願相携入大乘。

太虛自述

No. 609

法華大意卷上

廣陵寶城寺沙門 無相 說

吳興天池沙門 法聚 較正

長水平林居士葉祺胤 重較

### 妙法蓮經卷第一

造化萬物而至神謂之妙。主宰一切而不異謂之法。法即性也。妙即心也。蓋此心人人本具。此性亦人人本具。然有聖有凡之差者。非此心性有差。乃人悟迷之有差耳。其心性本體。聖人與凡夫元無相間隔也。非惟聖凡無間。乃至上天下地。紛紜萬有。動靜云為。亦無毫髮間隔者也。如是則妙法即心性之別名。心性乃太極之一體。人物共備。凡聖同源。更何疑哉。蓮華者。清淨無染。連續無間。亦喻此心古今無間。三世相連。色空無間。十方相連。蓋人之妙心妙性。前前無始。後後無終。大大無外。細細無內者也。經者。吾佛大聖人宣示此心此性之直言也。以此言直示人心奧理故謂之經。卷第一者。此經通有七卷。此為首卷。故云第一。第二乃至第七可知。此經雖七軸之微。實該盡三世間四法界之大道也。茲蓋尊眾命宣此經。但相才荒見淺。不能深發祕奧。請各靜中再參。幸甚。科主問曰。妙法蓮華題目義。已蒙開示至無疑。只是離却語言外。未審如何得受持。師曰。個裏本無元字脚。不須裏許更生疑。今朝舉起舊公案。萬象森羅悉受持。

曰。恁麼則泥團土塊先先佛。瓠子冬瓜上上機。師曰。大丈夫兮須若此。莫教落在二三機。曰。如是則全身領荷。師曰。更待何時。

### 姚秦三藏法師鳩摩羅什奉 詔譯

姚秦。東晉偽王也。姓姚名興。為秦國主。此經乃秦詔命翻譯。故標其國號也。三藏乃譯僧之通稱。謂其僧能通經藏律藏論藏也。法師。能弘揚教法。堪與人天為師範也。鳩摩羅什。譯僧名也。此云童壽。謂其僧童年而有耆壽之德也。奉詔譯。乃奉秦王明詔。翻譯此經也。然羅什譯此妙法於東土。釋迦談此妙法於西乾。且道釋迦佛未開口。羅什未落筆。作什麼生是此經之妙法。蓋此妙法。開口成雙楸。揚眉落二三。便不開口與揚眉。不免至人還檢點。舉如意云。會麼。若於此會得。上天下地。魚躍鳶飛。乃至草木昆蟲。無不為諸人翻譯此經妙法之微義也。如或不然。各人且向山僧未開口。諸人未到法堂。并父母未曾生。乾坤未曾判已前。着眼看看。此妙法畢竟是何言句。咦。泥牛負夜到蓮池。木馬馱春來柳岸。問曰。泥牛負夜到蓮池是甚麼義。師曰。是不到而到義。曰。木馬馱春來柳岸是甚麼義。師曰。是不來而來義。曰。恁麼則明明百草頭。明明祖師意。師曰。又是不會翻譯。曰。如何是會翻譯。師曰。請聽山僧一頌。妙法蓮華無一字。自來三藏錯商量。今朝更強重粘起。不似當時出水香。曰。如是則須向言前薦取。休於句下承當。師曰。具眼高人。何勞再問。

### 序品第一

妙法蓮華經五字如前說。序者。引起也。品者。品節次第也。此品乃引起妙經之前導也。第一者。此經有二十八品。此為首品。故為第一。此說乃講家義解如是而已。若是吾祖心法相傳即不然。蓋斯經妙旨。在易謂之太極。在天地萬物謂之理。在造化萬變謂之道。在人物為憎愛取舍之主謂之心。在動植云為去就苦樂之覺謂之性。然太極也。心也。性也。道理也。即一體無二之物。吾佛大聖人由諸人日用不覺。所以放光明洞照十方三世。為妙經之序引也。洞照三世。則無前際今際後際。洞照十方。則無四方八面上下。無四方八面上下。則示統體一極之元理也。無前際中際後際。則示全體一佛之天命也。舉如意云會麼。若於此會得。可謂十世古今。始終不離於當念。無邊刹海。自他不隔於毫端。其或不然。且以今日山僧舉揚為引序。其他妙法。須向靜中掃盡萬別千差。妄知妄見。單單舉個能知覺的道理。畢竟果是何物。於此豁然有悟。當頓覺所謂妙法也。太極也。道理也。心性也。皆備於我。何嘗欠少。而向外覓哉。問曰。學人便直下承



當。還成佛否。師曰。你說個承當。承當個甚麼。曰。承當作佛。師曰。是即也是。只恐分成兩橛。曰。如何是渾淪的道理。師曰。清風兩檻竹。明月一庭松。

如是我聞。

如是我聞者。集諸經通語。謂如是之經。我親從佛聞。乃阿難陀尊者結集法藏之舉。表此經有所傳受而已。更無他說。然如有是有非。我有真有妄。妄我者。即今各人四大六根身相是也。以此為我。我為不實。我既不實。聞亦成妄。真我者。擬心即錯。動念則乖。塵塵不昧。了了常知。無聲香之可聽嗅。無形狀之可模寫。豎窮三際。橫遍十方者也。諸佛指此真我為性。即如是經。諸佛指此真我名燈。即如是法。用如是真實無妄之我。聽如是真法華經。則心外無法。法外無心。言心則法法皆心。泥團土塊。糠粃瓦礫。皆自心也。言法則心心皆法。喜怒哀樂。逆順取舍。皆妙法也。又如是者。聖人言性。言性則無有不如者也。如非者。眾人論情。論情則無有相如者也。以不相如故。六道四生。苦樂升沉。本無而實有也。以相如故。萬物一馬。何真何假。天地一指。孰是孰非。如是領略。如是融會。方可謂之如是妙法華經。我親從佛聞。否則如是我聞之義。天地相間也。舉如意云。會麼。若於此會得。盡十方是個如字。遍萬物是個是字。通今古是個我字。即人法是個聞字。咦。既是是非干不著。平生生死豈相關。問曰。如是說了。還當得修行也無。師曰。也當得。也當不得。曰。如何當不得。師曰。說食不能飽。畫餅豈充饑。曰。如何是當得。師曰。一擊虛空成粉碎。千差萬別悉無名。

一時佛住王舍城耆闍崛山中。

此三句經。即靈山佛與大眾會集之一時也。更無他說。今欲詳講者。蓋此妙經旨趣。深固幽遠。若不字字發明。則聞者到了不知所講者何事。故今不避旁引碎分之誚。試為逐句重拈一遍看。夫一時者。非一非三。純真不雜。圓融妙合之時。此時也。上而無頂。下而無底。旁無邊畔。中無住處。易謂之太極。華嚴謂之法界。本教謂之法身。世通謂之道體。即所謂之喜怒哀樂未發之先。意必固我既忘之後時也。又謂之上不見有諸佛。下不見有眾生。外不見有山河大地。內不見有見聞覺知時也。眾人不一此時。背覺合塵。流浪生死。聖人常一此時。耀古騰今。輝天鑑地。佛者覺也。以具三覺義。故譯不翻。三覺者。自覺覺他。覺行圓滿。三覺具備。號之曰佛。自覺即明德。覺他即新民。覺行圓滿。即止於至善也。止於至善之地。則三祇果滿。萬德功圓。新斯民之耳目。則處處彌陀佛。家家觀世音。明明德於自己。則明徹古今。道同天地。具此三覺。十號圓滿。萬德莊嚴。轉萬物



總是自己。即一心含攝十虛。讚嘆不能窮。思議何可得。盡虛空遍塵刹之國土。無不尊崇。凡有血氣含識之生靈。無不親仰。天中之天。聖中之聖。故曰佛住王舍城耆闍崛山中。即說妙經佛所住處之靈山也。舉如意云。會麼。若於此會得。便悟十世古今。始終不離於當念。無邊刹海。自他不隔於毫端。一尊古佛。常在靈山。說此妙經。筵不曾散。其或未然。古佛去此遠已。聞者徒增喧噪。雖然如是。夾路桃華風雨後。馬蹄無處避殘紅。問曰。如何是一尊古佛。師曰。見山同山。見水同水。曰。學人不會。師曰。著衣喫飯憑誰力。運水搬柴用意參。曰。莫不參底心便是。師曰。認賊為子。曰。如何是不認賊為子。師曰。潛天同天。潛地同地。曰。恁麼則佛身充滿於法界也。師曰。木人石女本無情。堪歎世間同謗讚。

#### 與大比丘眾(至)心得自在。

此段經。吾佛大聖人說此經。相與具足大行大德出家證道果者。有萬二千。同住同行。同乞同聽也。又比丘者梵語。此云破惡怖魔乞士。乞士者。惟乞自濟。不田不商。怖魔者。威德自重。無障無難。破惡者。戒律自持。如水如霜。阿羅漢者梵語。此云無著不生應供。應供者。應受十方人天供養。不生者。不生一切妄想業緣。無著者。無諸世間情色染著。諸漏已盡。諸漏落情想之心。從此永盡。無復煩惱。無有復生世間煩惱。逮得已利。一切妄想。智能獨斷。得大利益。盡諸有結。結使煩惱。更不發生。心得自在。從此超出凡情。了無拘繫。得大自在。舉如意云。會麼。於此會得。一萬二千大比丘羅漢隨佛在此。轉大法輪。放大光明。作大佛事。其或不然。諸人且向靜中自看。看父母未曾生。天地未曾立。聖人未曾出世。祖師未曾西來。畢竟喚什麼做佛法。忽然看破。方悟人人本來面目。其大無外。其細無內。其前無始。其後無終。豎窮三際。橫遍十方者也。到此田地。自然會得。揚眉瞬目。也是佛與萬二千大比丘說法。迎賓作主。也是佛與萬二千大比丘說法。如是乃至塵塵刹刹。物物頭頭。俱是佛與萬二千大比丘說法。問曰。只如說法。說個甚麼。師曰。說你不薦。曰。只如薦。薦個什麼。師曰。本來是佛。曰。只如不薦。還是佛麼。師曰。也是佛。只是不會說法。曰。會說法時如何。師曰。方薦本來是佛。更聽說偈。眾生諸佛一般般。不信分明是自瞞。普請今朝齊領悟。一毫自覺大千寬。

#### 其名曰(至)如是眾所知識大阿羅漢等。

此段經。列萬二千大比丘首領名字。雖各有程說。不過因德因事權標名姓。據實而論。即一法身之性。一法身之名也。舉如意云。會麼。若於此會得。舍利弗之大智。明貫天人。目犍連之神

通。妙超今古。旃延論義。辯似懸河。樓馱見物。的如觀掌。如是乃至迦葉之第一傳心。陳如之最先得度。須菩提之能空萬有。阿難陀之善記諸經。俱在當下一時會了。其或未委。須向動靜中返觀自己。聽經時。能聽者何物。著衣時。能著者何人。如是乃至折旋俯仰。取舍進退。細細籌量。畢竟是何宗旨。忽然於此會得。始信真如界內絕生佛之假名。平等性中。無自他之形像。不是虛語。聽說偈曰。本無形相本無名。一有形名便不平。直下須能忘彼我。大千沙界一函經。問曰。從上諸聖演教度人。至今為甚麼度人不盡。師曰。夢裏明明有六趣。覺後空空無大千。曰。恁麼則雲開空自闊。風息水元平。師曰。不可隨語生解。曰。如何是不隨語生解一句。師曰。泥牛騎過海門東。笑殺殿前老松樹。曰。再請道一句。師曰。但行平等事。不必問前程。

復有學無學二千人(至)亦與眷屬俱。

復有。再舉之辭。學。先人皆訓為效也。謂後覺者。倣效先覺所為。漸至於純熟自然。則名無學。此二千尼眾。比前比丘未到純熟自然。故名學無學眾。又名少知識眾。因學力淺。少人知識耳。此段經。大略如此。山野不敏。敢再以學之一字細拈一遍看。蓋志於學者有萬不同。有志於功名而學者。則功名遂而無學。非無可學。志滿已。有志於文章華藻而學者。則出言成文。拈筆成章而無學。至窮已。有志於神仙而學者。到成仙行空而無學。有志於政治而學者。到國泰民安而無學。有志於聖賢而學者。到聖賢田地而至盡。然俱與學佛不相似。且道如何是學佛底志。蓋果真欲學佛。志必度盡眾生。眾生情異。各不同道。必須隨類度脫。既欲隨類度脫。亦須化身宇宙。既欲化身宇宙。必當高下無方。豈可守一執固。既不守一執固。又當博通諸子百家異道之書。既欲博通。則師亦不一。師既不一。寧可拘於教體。既不拘於教體。則此心廣大如法界。究竟如虛空。終日為而無為。長年作而無作。會古今於一念。收剎海於毫端。與天地萬物鑄作一塊黃金。即今古含靈不是兩般白玉。到此田地。強名曰道。學亦虛程。法界混融。志何用處。太極共芥子。本是一樣稱呼。法身同鳶魚。不是兩家活計。舉如意云。會麼。若於此會得。路遠夜行難把火。大家吹滅暗中行。問曰。如何是暗中行。師曰。不見有背面。曰。如何是無背面的消息。師曰。無耳方能聽。無舌始能談。曰。學人不會。師曰。高低嶽瀆。共轉根本法輪。大小鱗毛。普現色身三昧。

菩薩摩訶薩八萬人。

菩薩梵語。此云道學。摩訶薩。此云大道學。謂此八萬人。皆道學中大道學人也。經意大略如此。然講必以詳明為要。禪乃用直

指成功。今山野濫叨講席。亦辱禪門。試為諸公重拈一遍看。大道之語。不徒空傳其言。必須真證其實可也。真證道之實者。往古諸佛是也。學其證道之實者。往古諸聖賢是也。傳道知道之言者。往古高僧名人是也。不知道而各執一端者。往古支離偏見。如管窺豹。只見一斑者是也。嗚呼大道之體。豈容易窺測。容易證入。而為一乎。舉如意云。會麼。若於此會得。便見悟者。悟此也。參者參此也。格物者格此也。致知者知此也。如是乃至傳道傳心。明理明性。傳此也。明此也。明此大道之體。則大無不包。細無不入。前無不始。後無不終。傳此大道之用。則善無不興。惡無不斷。萬無不容。一無不入。致此大道之知。則評是非。准若權衡。別真偽。明如藻鏡。悟此大道之實。則往古來今。不離一念。一念不動。往古來今。天地萬物。本吾一體。一體不變。天地萬物。到此田地。無一物不是大道全體。無一物不是大道真名。洞山麻。廬陵米。信手拈來。趙州茶。金牛飯。信口吐吞。其或不然。更須諸緣放下。萬慮冰消。與蒲團打合。參箇父母未生話頭。忽然參透。方知元來如此。元來如此。舉如意云。咦。八萬高流來聽法。鼻端依舊大頭垂。問曰。如何是道。師曰。何其大愚。曰。學人不會。師曰。用會作麼。曰。恁麼則直下承當。更休擬議。師曰。聽說山頌。大丈夫兮宜早早。休言今日又明朝。等閑踢倒崑崙柱。風自清來月自高。

皆於阿耨多羅三藐三菩提不退轉(至)能度無數百千眾生。

此一段經。大略舉八萬人階位德行。更無他說。雖然如是。若不一一細明。則聽者不知。阿耨者何意。三藐者何為。試再以前經拈一遍看。阿梵語。此云無。耨多羅梵語。此云上。三藐梵語。此云正等。三菩提梵語。此云正覺。具云無上正等正覺。無上正等正覺六字。乃往古諸佛大聖人圓證之極果。六字之中。又只正等二字。乃諸佛之本心。大聖之圓證。無上二字。乃讚此正等田地。更無過上之道也。正覺二字。謂到此正等田地。始謂之正覺之道。故往古諸佛。到今大聖。到此正等。方為究竟。夫正等者。一般般之謂也。蓋法身正等一般般之際。上不見有諸佛之聖。下不見有眾生之凡。四圍不見有萬類之差。一己不見有三世之異。道個圓圓果海。判屬言銖。指為上上大乘。還成露布。舉如意云。會麼。若於此會得。便見得十方諸佛。歷代祖師。無有兩個鼻孔。古往聖人。後來作者。只是一樣舌頭。其或不然。更須靜中看個一歸何處話頭。久久功深。忽地頓悟。方自會得佛不出世。祖不西來。前後際斷。人法兩忘。山野今日講演妙經。也是辨空華之濃淡。較兔角之短長者也。謂之正等。也是三千里外問長安。問曰。且道如何是正等。師曰。你從幾時不正等。曰。



恁麼夢裏明明有六趣。覺後空空無大千師曰。有言已便妨談道。無物何由更惹埃。曰。既是妙道不離無相旨。紛紜萬事總非真。師曰。又是不正等。曰。如何是正等。師曰。聽說偈曰。正等由來一更圓。既非形像豈容言。諸人果欲求根本。頭上元無兩樣天。

其名曰文殊師利菩薩(至)八萬人俱。

此一段經。列八萬大菩薩上首之名也。然一一菩薩。名有所表。如文殊表智。觀音表仁。一十八位菩薩之表。共成一佛德也。山野見淺。再為諸人詳拈一一看。夫智者心胷了了。俯仰明明。既不為根塵之所幻惑。豈更隨生死之所繞纏。有智者故謂之妙德。以用力少而得功多也。又謂之妙吉祥。以道理精明。行藏簡易。無有不吉祥者也。故為君者。能足此智。則可以令百姓如夷齊。為臣者。能足此智。則可以致君主為堯舜。為父母者。能足此智。則可以令子孫純亦不已。為子孫者。能足此智。則可以致父母克明峻德。為夫者。能足此智。則可以加婦貞潔。為婦者。能足此智。則可以增夫仁義。如是乃至兄弟之相規。朋友之相訓。長幼之相導。莫不皆以智為之先引。至若不足此智。則君臣陷於不仁不義之坑。父子溺於無慈無孝之海。夫婦入於怨天怨地之林。如是乃至生死之相續。如蟻旋磨。憎愛交纏。似象溺泥。皆無智者之所為也。又仁者千古聖賢之心也。為眾善之長。為教化之源。以之用於一家。則一家康和。以之體於一國。則一國肝膽以之教於萬物。則萬物活潑潑地。一太極也。以之斂於一心。則一心真卓卓然。一毗盧也。舉如意云。會麼。若於此會得。文殊與諸人共目揚眉。觀音齊萬物同舌開口。其或不然。且向靜中自看。著衣喫飯。果憑誰力。運水搬柴。真是何能。忽然會得。自信道文殊與吾携水去。普賢猶未折華回。不為分外。如更遲疑。聽說山偈。大道明明不住形。呼驢呼馬強安名。道人不住明明裏。呼馬呼驢信口謊。問曰如何是即今文殊大智。師曰。眾生怕受刀砧苦。山僧怕食眾生肉。曰。恁麼則有智者趨吉避凶。師曰。不止趨吉避凶。亦乃轉凡成聖。曰。既吉既聖。還用智也無。師曰。還用。曰。既吉既聖。用智作什麼。師曰。隨處弘揚諸佛教。隨緣廣破眾生迷。曰。到什麼田地。方不用智。師曰。同一法性。共一法身。曰。如何是一法身。師曰。都講迴向。

爾時釋提桓因與其眷屬萬二千天子俱(至)退坐一面。

此假經。序法華會上諸天人王皆來聽法也。如雲從龍。風從虎。乃自然之道。又顯大聖人出現演教。如日麗天萬類無有不覩者。又舉萬類遠近高下悉至者。大聖人威德仁慈。廣大悉備。不言可知。如世典所謂聲名洋溢。凡有血氣。莫不尊親。蓋自古及今。

道德不明。只是性命不明。性命若明。則道德無有不明者。性即理也。命即我之理也。在我之理明。在人之理亦明。在人之理明。在物之理益明。如是乃至盡萬有之形類。極空界之紛紜。理無不明。理既明。事無不明。事既明。所謂道德。所謂仁義。乃至禮義教化。文章刑政。無有不明者也。以大聖人性明命明。名為大經。大本。大法。大道。大德。大功。大音。大行。以具備萬德。故高下遠近有血氣者。皆來尊親。如自身親自身。不用他教也。舉如意云。會麼。若於此會得。見其相者無不敬。聞其言者無不信。從其行者無不悅。共其住者無不一。其或不然。諸人各向肝膽上繫個克字。如是克來克去。克到無可克處。當自覺盡十方是個仁善。頓忘取舍之心。極三際是個中常。圓入正等之域。到恁麼時節。聲名洋溢。巨細尊親。亦分內事。更何疑哉。問曰。如何即是克義。師曰。如人家打牆。打過我家一尺。便克去這一尺如本無一般。曰。恁麼則進道十分容易。師曰。雖是容易。天下人不肯克去。曰。不肯克時如何。師曰。你非我是今還古。虎戰龍爭卒未休。曰。直下便克時如何。師曰。天其時。地其利。人物和。老者安。少者懷。朋友信。

#### 爾時世尊四眾圍繞(至)一心觀佛。

此一段經。的的大意。只是序說妙經之由。更無他說。山野不敏。再以無量義處禪定拈一遍看。夫無量義者。在了一明明之際謂之心。為塵塵剎剎之主謂之理。吾祖達磨大師自西而來。不立文字。直指人心。見性成佛。謂之禪。本土孔孟諸子。立言設教。繼往聖開來學謂之中庸。諸塵勞中人。不明此者。謂之迷妄。聰明知此而不修行者謂之自棄。間有知此而修行。不能到此田地者。謂之不勇。有晝夜精勤。竟無成實者。謂之不明。有成小聖及神仙。并能文能說。能伎藝。能脫化而止者。謂之不圓。有纔得悟徹。便住寂滅者。謂之不大。有分彼分此執道執儒者。謂之不一。又有著衣吃飯。竟不知著衣吃飯者是誰。又有只知富貴榮華。不知富貴榮華者何人。俱謂之不悟。舉如意云。會麼。若於此會得。四眾圍繞。儼然靈山初會。豈分昨日今朝。四華繽紛。朗然妙經初舉。豈別西來東土。其或未委。請各發歡喜心。一心觀佛。以佛攝心。以心觀佛。工夫成片。則當自知大千沙界海中漚。一切聖賢如電拂。無量義處。更何疑哉。問曰。如何是無量義。師曰。桃紅李白薔薇紫。薑辣梅酸甘蔗甜。曰。如是則心恐不能一去。師曰。隨流認得性。無喜亦無憂。曰。恁麼則處處綠楊堪繫馬。家家有路透長安。師曰。猶是吃力。曰。如何是不吃力一句。師曰。綠楊休繫馬。有路即長安。曰。恁麼則大海

從魚躍。長空任鳥飛。師曰。又是放蕩。曰。如何是中庸一句。師曰。病率自知飯滋味。到家自不問途程。

**爾時佛放眉間白毫相光(至)起七寶塔。**

此一段經。大聖人顯本現迹。光照萬八千世界。靡不週遍。即是大無不包。細無不入。了了常知。塵塵不昧者也。於此世界盡見彼土。即十方色空無間。於此佛處聞彼佛說法。即道理無間。於一時中。見諸比丘。修行萬行。歷無窮劫。成佛度生。入大涅槃。後人起塔。即三世古今無間。蓋妙法之體。即人之本有妙心。大此妙心。於無邊虛空之外。不見其外。小此妙心。於無入微塵之內。不見其內。前此妙心。於無量塵沙大劫之前。不見其始。後此妙心。於無窮塵沙大劫之後。不見其終。識此妙心。則四海大聖人說道理。乃說此心之道理也。萬世大賢人行道理。乃行此心之道理也。以諸人於此心之道理既昧。故吾佛大聖人。於眉間光。圓現此個妙心即十方國土。圓現此個妙心即三世年劫。以即三世年劫故。當知此心。不隨往而往。不隨來而來。若隨往而往。則此心早隨前前而往。何有今日之知。若隨來而來。則此心以隨後後而來。何有今日之覺。以此心即十方國土故。當知此心。不與萬法為侶。不與諸塵作對。以不與萬法為侶諸塵作對。故知此心不隨物而物矣。此心若隨物而物。見山化為山。見水化為水。何得即今靈然不昧。了了常知者也。舉如意云。會麼。若於此會得。便見光明寂照遍河沙。其或未然。再聽說偈。此心元不屬根塵。細入寬包妙更神。只為諸人迷不悟。眉光示現本來身。問曰。如何是不屬根塵。師曰。了無名字。曰。如何是妙更神。師曰。不可自昧。曰。如何是迷不悟。師曰。認奴作郎。曰。如何是本來身。師曰。豎窮三際。橫遍十方。曰。恁麼則人人是佛。不須更疑。師曰。開口成雙橛。揚眉落二三。

**爾時彌勒菩薩(至)瞻察仁者為說何等。**

此一段經。大略只是彌勒因佛放光圓現十方三世而生疑。其不知十方三世原備於我。而彌勒自狹。故有重重之問。蓋人人妙性。大而無外。上天下地。中間紛紜萬有。無不是在我妙性之實也。蓋人人妙性。微而無內。既微而無內。往古來今。中間生滅萬別。無不是在我妙性之體也。如是則十方諸佛念念在此妙性中成正覺。樂者愈樂。一切眾生念念在此妙性中起輪迴見。苦者愈苦。更何疑哉。舉如意云。會麼。若於此會得。世尊覩明星而悟。悟此也。圓悟聞雞啼而了。了此也。如更有疑。各各向蒲團上三十年莫開口。返復看個父母未生已前面目。久久打成一片。當自覺知真如界內。絕眾生諸佛之假名。平等性中。無自己他人之影像。問曰。道理本一。為甚麼各不相顧。師曰。各不相顧



者。為不知一。曰。如何是一。師曰。溪澗溝壑之歸海。釵釧瓶盆之入爐。

### 爾時文殊師利(至)故現斯瑞。

此一段經。是文殊答彌勒之問。言我曾於往古佛會中。也曾見放光圓現十方世界。會合三世時節。然後說妙法華經。今日佛既放光圓現會合。與昔日一般。我知佛當說妙法華經必矣。此段經。又謂之引古證今。古佛光中。圓現十方三世全體。說法華大經。今佛圓現十方三世全體。亦必說法華大經。蓋此大經。在諸佛大聖人之心謂之正等。正與十方三世一般般也。又謂圓覺。圓攝十方三世。無有不覺也。又謂之大乘。大包十方三世。無不乘載也。又謂之中常。不偏不倚。不更不變也。又謂之圓圓果海。諸修行人到此為究竟之地也。又謂之深深妙處。小智小見不能彷彿窺視也。又謂之法身道體。太極法界。乃至殊方異域。立名安號。發明此大經之大義。皆為發明諸佛大聖人之元心也。良久。人不明此心久矣。以不明此心。故吾佛大聖人有此經之說。欲說此經。不是尋常之小事。故吾佛大聖人又從眉間放大光明。光中圓現十方世界。融會三世時節。以為說此大經之先兆也。若有智。即知世尊說經已畢。舉如意云。會麼。咦。十世古今。始終不離於一念。無邊剎海。自他不隔於毫端。問曰。如何是兩大法雨。師曰。枯槁一時新。曰。如何是吹大法螺。師曰。聾者悉皆聞。曰。枯槁見不能生。聾者見不能聽。如何。師曰。直捷根原佛所印。摘葉尋枝我不能。曰。如何是直捷一句。師曰。聽說山偈。人人是佛不須疑。記取中峰兩句詩。便就今朝成佛去。樂邦化主已嫌遲。

### 諸善男子如過去無量無邊不可思議阿僧祇劫。

劫之一字梵語。此間言語謂之時。阿僧祇梵語。此間言語謂之無數。無數者。乃數目中之大數也。不可思議。無量無邊。俱大數目也。以人心狹小自短。不自覺悟本具之性。其前前無始。後後無終。吾佛大聖人。光中融徹往古來今。意欲人人頓悟本具之性。如是而長。如是而大也。其柰當人迷厚。猶不領悟。所以彌勒有重重之問。文殊有重重之答。文句雖多。其大略只是欲人人頓悟本具之性。大而無外。小而無內。前而無始。後而無終也。此兩句經。文殊雖是舉最前之遠。正欲露極後之長。試再以無數時詳講一遍看。時即劫。如八千里方徑厚之大石。以二錢半輕帛。百年拂一遍。拂盡此石。不見微塵。名為劫。無數。即阿僧祇。乃三千大千世界微塵數也。以一捻微塵。尚有百萬之數。況以大千世界微塵為數。蓋一千個天地。名為小千世界。千個小千。名為中千世界。千個中千。方名大千世界。以如是世界。總

作微塵數。名阿僧祇也。阿僧祇。是大千微塵數。大千微塵數。名為不可思議數。不可思議大千微塵數。名無邊數。無邊大千微塵數。名無量數。良久。文殊引古證今。雖欲現示人人本具妙性。故舉大數以充廣。然本具妙性。比不齊。類不及。文殊雖有大智。旁引曲喻。亦不能盡此妙性之萬一。妙性具體。豈容易領悟乎。諸人宜再細思。問曰。妙性具體。如是難明。且道今日講演還明得也無。師曰。如一毫置於太虛。似一滴投於巨壑。曰。恁麼則道曠無涯。行人不盡。師曰。誰著你行來。曰。便如是坐斷時如何。師曰。諸佛皆稱讚。

**爾時有佛號日月燈明(至)教菩薩法佛所護念。**

此段經。大略只是引古證今。更無他說。蓋自有天地人物已來。聖人間出。相貌名號。各各不同。求其性善之心。則無不同也。殊方異域。立言設教。亦各各不同。求其性善之言性善之教。則無不同也。頭戴足履。身服手持。亦各各不同。求其性善之威儀性善之恭敬。則無不同也。以世道極澆。人心大繆。吾佛大聖人出現於世。說法四十餘年。談經三百餘會。人心既純。世道一厚。乃放光圓現。露一法身。意欲使人人頓悟一法身也。其柰眾人尚迷。故彌勒有重重之問。重重問中。皆融古今於一念。收剎海於毫端之句。其柰聽者不薦。所以文殊亦有重重之答。重重答中。雖引古證今。亦融古今於一念。收剎海於毫端之句也。如無量劫前雖遠。佛具十號。與今佛具十號同。佛說法中善。與今佛說法善同。如是乃至開權顯實。會三歸一。授記入滅。無有不同。後人舉其教者。精進必成。懈怠不廢。亦無有不同者也。舉如意云。會麼。若於此會得。燈明不曾過去。彌勒何有未來。泥團土塊。放大光明。瓠子冬瓜。熾然常說。其或未然。且學妙光精勤。莫隨求名懈怠。問曰。經中大意。只要攝末歸本。且道經歷無數佛出。為甚麼尚三界紛紜。師曰。自是你三界紛紜。聖人何嘗不一。曰。爭柰目前分別何。師曰。縱分別。俱是辨空華之濃淡。較兔角之短長。曰。如何是無分別。師曰。芍藥華開菩薩面。棕櫚葉放夜叉頭。曰。猶是學人分別處。師曰。能分別者無分別。

**爾時文殊師利(至)佛當為除斷令盡無有餘。**

此段經。是文殊把前說重拈一遍。謂古佛如此。今佛亦如此。乃至十方佛亦如此。皆開三顯一。無二道也。蓋天地中間。惟人最靈。人之一身主宰。只一個性字。性若明。道德仁義禮儀教化無有不明。無有不是。夫性者。在天地造化謂之理。故曰。宇宙中間。一理而已。在我性理之私謂之情。故曰。三界不能超。惟情為罣礙。苟能克去在我之情。惟是一團天性。則念念燈明說法。

頭頭妙光談經。六度萬行。本自圓成。四德三身。竟非他得。其或未然。須向靜中細看。自生此身已來。十年二十年乃至七八十年。年雖見有已往之時。竟不隨已往之時所遷者。却是何物。即知此心既不隨已往。必不隨後來。既不隨後來。亦不居現在。即知此心無最初句。無末後句。亦無現在句。以無過去未來現在。三世不能遷變故。十方虛空亦不能包裹。虛空既不能包裹故。即知此心豎窮三際。橫遍十方。舉如意云。會麼。我見燈明佛本光瑞如此。以是知今佛欲說法華經。其或不然。諸求三乘人。若有疑悔者。佛當為斷除。令盡無有餘。問曰。妙光法師是文殊前身。彌勒菩薩是求名後體。恁麼則今古宛然。為甚麼又道本無今古。師曰。今自今。古自古。知今古者元無今古。曰。如是則隨流認得性。無喜亦無憂。師曰。若存個認字。三千里外問長安。曰。如何即是。師曰。不許道著。曰。恁麼則開口成雙槩。揚眉落二三。師曰。聽說山偈。個裏元無古與今。化身隨類號觀音。諸人要見觀音面。山自高兮水自深。

## 方便品第二

方便者。即隨方就便義也。如有大城。隨方來者。非止一路。如東方來者從東門入。西方來者從西門入。則為便益。非此則不方便。蓋人之備足妙性。雖人人本具。欲全體指出。縱佛聖有大辨才。必不能也。必因其已發之端。旁引曲唱。令其自悟。故名方便。如人殺物令苦。即指曰。自性本無欲殺之理。即教之令不殺生。又如人盜他人所愛。即指曰。自性本無欲他盜己所愛之理。即教之令不偷盜。如是乃至因人以見聞自狹。即指曰。自性廣大。包納虛空。因人以生死自短。即指曰。自性固久。莫究始終。如上所舉等有萬億差別。俱名迷妄自偏。故大聖人有如上萬億法門。俱名方便。舉如意云。會麼。若於此會得。諸佛不須出世。祖師豈用西來。山華開似錦。毗盧妙相。依舊莊嚴。野水湛如藍。太極圓圖。斬新拈出。其或不然。聽說山偈。自性堂堂要見聞。鳶飛魚躍看精神。不然更欲行方便。甘作忙忙門外人。問曰。有一人曾來不舉步。且道是門裏門外。師曰。何止門外。三千里外。曰。如何是門內。師曰。曾來不舉步。曰。恁麼則擬心一[糸\*糸]。對面千里。師曰。未為靈利。曰。如何是靈利。師曰。未出胎時。度人已畢。更討方便。笑殺旁觀。

## 爾時世尊從三昧安詳而起告舍利弗。

此三句經。是經家提起說妙法之由。講說大略如此。然講以明白為能。禪以入定為要。山野既濫講肆。亦辱禪門。試以三昧二字。再細翻譯一遍。末後以禪融會看。三昧。西國梵語。此國華言曰正受。正定正心。正心者。無一切心中之常也。常中則自絕



忿懣憂患恐懼好樂之心。正定者。諸境不能動。誠之極也。極誠則能經綸大經。建立大法。化育萬物。正受者。諸事不能惑。聖人之至也。至聖則見而民莫不敬。言而民莫不信。行而民莫不悅。正受既聖之至。正定又誠之極。正心中到之常。則大聖人之心。如晴空止水。杲日精金。無毫髮瑕疵也。大聖人之德。如天普覆。如地普擎。如日月普照。無偏私也。大聖人之道。如春發生萬物。如秋成熟萬物。無不善也。大聖人之量。如虛空包含萬有。如父母養育諸子。自有餘也。大哉聖人之性。以十方三世為一體。以六道四生為一身。如斯圓融妙會。稱讚不能及。講演不能盡。修行不能到。譬喻不能齊。強名曰三昧。三昧豈容易證入乎。吾佛於此三昧中。不見有前際。不見有後際。不見有中際。不見內。不見外。不見中間。然亦有中間內外前後等。故謂之佛之三昧。問曰。講既明矣。且道如何是禪。師曰。如棒打虛空。棒棒不見痕。曰。恁麼則夢裏明明有六趣。覺後空空無大千。師曰。亦是有無成二邊。夢覺分兩法。曰。如何是不住二邊頓忘兩法之句。師曰。半夜井吞水。長空雲弄風。曰。學人不會。師曰。舍利弗當知。

諸佛智慧甚深無量(至)所不能知。

此一段經。言天下大聖人之心。無人能知。無人能識也。蓋諸佛至聖之心。無過去未來現在之時可時。無東西南北上下之方可方。無眾生之名可名。無天堂地獄之境可境。溥博高明。廣大純一。豎窮三際。橫遍十方也。以橫遍十方。故此心無空色之間。以豎窮三際。故此心無古今之間。以無古今之間。乃前後際斷。以無色空之間。乃中外情忘。則還一真如也。前後際斷。則本一圓覺也。正當恁麼田地。上而無頂。下而無底。傍無邊畔。中無住處。本教謂之圓體。即清淨法身。儒教謂之原道。即無極而太極。老教謂之一。即無極大道。然此心也。有窺測而知者。窺測而知者。乃天下有智者也。有悟此心而修行。漸革平日之小者。乃天下之賢哲也。有修行工夫純一。猶帶分別念在乃天下之小聖也。夫諸聖之心。圓滿廣大。同天地之覆載。同日月之照臨。體萬物性情而設教。故凡有血氣。莫不尊親。隨萬物方便而立行。故凡有形質。無不一體。舉如意云。會麼。若於此會得。便見得山僧手中如意。却是諸人眼見。雖是諸人眼見。却是山僧手持。其或不然。更聽山偈。諸佛眾生一般眼。何事紛紜見萬差。肯把藩籬俱撤去。依然還是大人家。問曰。如何是諸佛智慧。師曰。過水脫鞋。買帽相頭。曰。此是常人俱會。為甚麼道所不能知。師曰。常人過水欲人背。買帽欲人與。曰。恁麼。則克去己私。便同佛智。師曰。一聲齊喝采。聽唱太平歌。

所以者何佛曾親近(至)意趣難解。

此一段經。自問諸佛智慧甚深。小聖不知者何。向下自答。以佛曾親近百千萬億無數諸佛。非惟親近。亦乃聞其道。非惟聞道。亦乃行其道。以諸佛有如是久遠工夫。大廣博學問。大勇猛精進。大成就道德。所以有說。意趣難解。蓋諸佛大聖人之道。中庸之道。故天下可均。爵祿可辭。白刃可蹈。中庸不可能也。智即般若之智。故眾生心處處能思惟。不能思般若。經即妙法華經。故大火洞然。擔入乾草不燒。亦未為難。暫讀此經為難。大哉大聖人之道。無方故不可到。無言故不可解。無相故不可視。無意路故不可思。無柄杷故不可執。舉如意云。會麼。若於此會得。便見得道本不遠而人自遠。道本不難而人自難。洞山麻三觔。一夏將來合繩也好。撚線也好。青州衫七觔。冬天穿上。打眠也得。坐禪也得。廬陵米。早炊可以作粥。晌午可以造飯。百丈屎。和水則澆茄。拌灰則栽芋。更何疑哉。其或不然。須是諸緣放下。萬慮撥開。單單看個一歸何處。忽地頓悟。始信大千沙界海中漚。一切聖賢如電拂。到此田地。佛法世法。打成一片。凡情聖情。元沒兩般。更聽說偈。自家一個黃金面。世世生生被土埋。香水滿盆能一洗。光明依舊照靈臺。問曰。如何是黃金面。師曰。萬劫無更變。曰。如何是被土埋。師曰。六道自輪迴。曰。如何是能一洗。師曰。四相頓空爾。曰。如何是照靈臺。師曰。三身圓證來。曰。此大似講說。師曰。誰為你說禪。

舍利弗吾從成佛以來(至)令離諸著。

此一段經。世尊自陳自成佛以來。四十餘年演教。只是要人離著。蓋著者。心入諸境不能遠離是也。境有有情境。有無情境。無情境者。大而天地。細而微塵。眾而萬有紛紜。一而太極全體。但無知覺。名無情境。有情境者。大而覺體。細而含靈。眾而萬類升沉。一而法身不動。但有知覺。名有情境。如是乃至眼所見。耳所聞。鼻所嗅。舌所嘗。身所覺。意所思。或順。或逆。或近。或遠。或善。或惡。或親。或疎。俱名為境。於此境上不能消融成一法身。不能明了成一佛知見。俱名為著。以眾人不能離此著故。吾佛大聖人。以六度萬行。種種因緣譬喻言教方便。廣談曲論。四十餘年。無他意。只是要人離著。舉如意云。會麼。若於此會得。青青翠竹。總是法身。鬱鬱黃華。無非般若。鳶飛魚躍。與四十餘年演教無差。雨施雲行。與三百餘會談經不異。其或不然。更須提個父母未生前話頭。工夫純熟。忽然頓悟。到此田地。方自悟得截瓊枝。寸寸是玉。析栴檀。片片皆香。無淫怒癡可去。如一輪明月掛秋空。無戒定慧可修。似一點寒冰烹大冶。嘆。更聽說偈。通身是病通身藥。身若空來藥亦

空。我許道人俱勘破。泥牛騎過海門東。問曰。如何是諸著。師曰。眼見耳聞并意想。曰。如何是離諸著。師曰。眼無見。耳無聞。意無想。曰。恁麼則木人撫掌。石女謳歌。師曰。不可墮在無事界裏。曰。如何是中庸一句。師曰。恁短恁長休剪綴。隨高隨下自平治。

所以者何如來方便知見(至)唯佛與佛乃能究盡。

此一段經。大略只是極讚大聖人之心。究盡明了。誠實廣大。非世間小聖小智小見小解所能窺測者也。試再以目前淺小比並一遍看。蓋世之言壽者。廣成子千二百歲。彭祖八百歲。至壽者天地。邵子推之。謂有十二萬九千六百歲。未有如佛言壽。以三千大千世界微塵數歲猶為至短。世之論國一統者。不過四海九州之內。一萬八千之中。至廣者不過日月出沒之際。星辰旋繞之間。未有如佛之言日月出沒之際。星辰旋繞之間。乃一須彌盧耳。如是千須彌盧謂之小千世界。如是千小千世界。謂之中千世界。如是千中千世界。謂之大千世界。如是千大千世界。微塵數大千世界。始是一層。如是八萬四千層。始是一華藏世界。如是一華藏世界微塵數華藏世界。名為一毗盧遮那佛王化。如是毗盧遮那佛不知其數。豈國土世界能知其數。如是乃至論理論事。唯佛甚深。世莫能及。又有謂佛言雖廣大無實。自是人靜思。肯靜思則其實自性之理。大而無外。非有形國土可能充滿。細而無內。非有智聰明可能見識。舉如意云。會麼。若於此會得。一月普現一切水。一切水月一月攝。如帝網珠。光光互照。無前際。無後際。無南方。無北方。圓陀陀。活潑潑。捏不成。劈不開。其或不然。更聽說偈。人人心即古毗盧。聲色門頭有即無。但肯回光光自照。乾坤何法可親疎。問曰。諸佛既多。世界不少。畢竟是一是多。師曰。非一非多。曰。如何是非一非多。師曰。一有多種。二無兩般。曰。恁麼則論理元非二。隨情有萬般。師曰。文字之師。皆如是見。曰。如何是離文字一句。師曰。老虎看水磨。轉看轉不知。

諸法實相(至)究竟等。

此一段經。言諸法實相。即目前萬法。正妙經本意。即十方諸佛圓證之實理。十方諸佛圓證之實理。即眾生本具覺性。眾生本具覺性。即世間流轉苦樂升沉之境。以眾生不悟諸法。不了諸法。不知諸法。癡癡昧昧。於此境上起惡心。作惡業。死此生彼。展轉流浪。受苦無窮。故大聖人指此諸法。謂之夢幻。謂之泡影。令人於此諸法境上求個無相無名。不動不變的真理。以聲聞小乘人。不識諸法圓理。於此境上。厭苦求樂。破有執空。故大聖人又指此諸法。即是真空。即是妙有。令人於此諸法境上。求個圓



融妙會的覺性。以菩薩大乘人未知諸法實相。劫劫苦修。世世力進。務欲度盡眾生。必要證極大道。故大聖人又指諸法即是實相。即是法性。即是佛理。蓋諸法實相之妙。參此。儒謂之格物。悟此。儒謂之致知。知至物格。則諸法實相。了了常知。明明不昧者也。以至修身齊家治國平天下。無不靈驗。以至超出死生。亘古亘今。以至頓入涅槃。徹上徹下。無有不妙應者也。舉如意云。會麼。若於此會得。松直棘曲。鵠白烏黑。皆實相之體。生迷佛悟。事俗理真。皆實相之用。其或不然。明日再為諸人打葛藤一遍。問曰。目前諸法皆實相。因何人不覺悟。師曰。不是不悟。只是不肯悟。曰。學人參亦有年。也不是不肯悟。師曰。既肯悟今日又問什麼。曰。肯悟時如何。師曰。諸法無非實相義。

### 諸法實相(至)本末究竟等(重拈)。

此一段經。南嶽天台諸師。講各不同。惟溫陵環師講為切當。今依環師重拈一遍看。夫實相者。即相而真。與十方往古大聖人同體無異。圓常明妙。更無變別之法性也。然此法性。惟佛與佛乃能究盡。故經云。佛所成就第一希有難解之法。惟佛與佛乃能究盡諸法實相。諸法者。乾坤萬有紛紜。總不出十法。十法者。一相。二性。三體。四力。五作。六因。七緣。八果。九報。十本末究竟。本末究竟者。一切目前萬法。一一皆有根本終窮。一一皆有窮盡實際。如目前卓子香爐。乃至松樹桃樹人物等類。不能窮盡實際。不足謂之格物。不能究盡根本。不足謂之參禪。亦不謂之徹悟。亦不足謂之致知。致知徹悟。則目前卓子香爐。松樹人物。無不能格無不能參其本末究竟者也。再以十法細拈一遍看。報者。應果為報。如一樹桃子既實為果。果熟為報。果者。緣熟為果。如一樹桃子既開華結實。雨露潤滋糞土封培。到香熟時節是也。緣者。助因為緣。如一樹桃子雖開華榮茂。若無雨露并糞土封培為助。終不能自榮自華自果。因者。資始為因。如一樹桃。雖目前榮茂。其根本必有最初之日。作者。乍起為作。如一樹桃。雖有最初之日。種桃之心。乃乍然而發起也。非固有之性也。力者。利用為力。如一樹桃到香熟時。食得其味。賣得其財是也。體者。形具為體。如一樹桃。或華或果。枝葉散殊。根本深厚是也。性者。相本為性。如一樹桃為相。亦必有一樹桃之根性也。相者。可見為相。如一樹桃開華結果。人人皆見。所謂其性其實。其本末究竟。人皆不知。故唯佛與佛乃能究盡明了而無虛妄。其他聖人雖明不能究盡。

### 唯佛與佛乃能究盡諸法實相(至)本末究竟(再拈)。

此段經已講兩遍。今當第三遍。聽者亦莫厭煩。蓋此段經乃格物之要端。參禪之正軌。若不細細條陳。晚學終莫入頭。(相)才雖不敏。悟亦有宗。試再以此經大略拈一遍看。夫世間萬法紛紜。不亦千變萬化。故謂之諸法。雖不可一一指陳。總其切要。不過此十法可以盡無餘蘊矣。一如是相者。即是總指萬有紛紜。千變萬化。眼可見之相狀也。然此相。小聖無豎窮三際橫遍十方不可思議大眼目。局於世間聞見之狹者。相雖可見。亦不能窮盡無餘。故唯佛與佛乃能究盡。二如是性者。即我與萬物形狀雖殊。究其根本。無不一也。一即是性。性即理也。此性此理。雖有二名。無二體也。故強調之性。性也者。大而無外。細而無內。前而無始。後而無終。大聖明賢。指為圓覺。太極。大道。元體。上帝。明德。中庸。法身。亦不能盡此性溥博淵泉廣大悉備之全體也。故曰。唯佛與佛乃能究盡。乃至如是體。如是力。如是作。如是因。如是緣。如是本末究竟等。皆唯佛與佛乃能究盡。非世間小聖可能盡知也。舉如意云。會麼。若於此會得。可謂道是法住法位。世間相常住。其或不然。須向靜室中焚香默坐。參此山僧手中如意。前萬萬劫更前。却是何物。後萬萬劫更後。復為何物。工夫純熟。打成一片。則當自覺古今不離於當念。剎海不隔於毫端。說甚唯佛與佛。問曰。如何是諸法實相。師曰。唯佛與佛。乃能究盡。曰。怎麼則眾人不曾。師曰。不是不曾。不肯信。曰。肯信時如何。師曰。大地是黃金。

如是體如是力(至)本末究竟等(復講)。

形具為體。利用為力。蓋有如是體相。則有如是利用也。如有三十二大人相形體。則有王化三千界之利用。如有清淨遍一切處之體。則有周遍十方融徹三際之利用。如有牛之形具。則有耕耜利用。馬之形具。則有馳驅利用。如是乃至誅草剖人。芟苴剖鱉。水銀可以化金。硫黃可以乾汞。蓮華大藥。服之則與日月齊壽。準提真言。誦之則與乾坤等倫。此皆常聞之語。至如擬心即錯。動念即乖。旃延之口不能談。舍利之智不能測之大體大力。却又許誰能見其形具。能知其利用哉。既形具利用不能盡知。則如是作。如是因。乃至如是本末究竟等。又豈能盡知。故曰。唯佛與佛乃能究盡。其他非通不知。不能盡知也。舉如意云。會麼。若於此會得。會古今於一念。收剎海於毫端。其或不然。且向靜中默默再看。生從何來。死從何去。忽然頓覺。當自信知海底金烏天上日。眼中童子面前人。更說甚麼唯佛與佛乃能究盡。嘆。更聽說偈。乾坤萬別千差體。根本由來一個身。於此一身心亦一。頭頭物物總天真。問曰。如何是成佛之因。師曰。善則力行。曰。怎麼則見善則修。逢惡則止耶。師曰。聖聖相傳無異語。

曰。死來畢竟作麼生。師曰。若見有死。猶是道眼不明。曰。道眼明時如何。師曰。本無生死。曰。目前生生死死無有了期。何得言本無生死。師曰。唯佛與佛乃能究盡。

如是作如是因如是緣如是果如是報(復講)。

乍起謂之作。資始謂之因。助因謂之緣。緣熟謂之果。應果謂之報。如人忽起一念害人之心。資此心為始。後逢同欲害其人者相助。則乍起害人之念成矣。害人之事既成。豈無後來害己之報。又如人忽起一念欲成佛之心。資此心為始。念念不忘。後逢同欲成佛之人為緣。共修六度萬行。則三十二相。八十種好。萬德莊嚴之佛果必成。佛果既成。人天瞻仰。十方稱讚。豈是無應果之報。蓋世萬法。總不出如是性相等十法。如是十法。又總不出性相因果四字。以有如是因。必有如是果。有如是相。必具如是性。先聖所謂天生蒸民。有物有則。又云。出乎爾者反乎爾者也。世所謂種瓜得瓜。種豆得豆。作善見善。作惡逢惡。又因心作業。因從性之覺。緣熟為果。果因性之相。性相因果。展轉升沉。小聖不能盡知。唯佛乃能究盡。舉如意云。會麼。若於此會得。可謂道夢裏明明有六趣。覺後空空無大千。又不止於有六趣空大千而已。其或不然。聽說山偈。本具圓明淨覺身。元非因果及根塵。當人肯息最初念。法界依然只一真。問曰。如何是一真。師曰。仁者見之謂之仁。智者見之謂之智。曰。恁麼則道本一體。見有多端。師曰。我亦不知。曰。既不知。為恁麼高談闊論。師曰。為你不知。曰。知則如何。師曰。法界無二相。

爾時世尊(至)言辭相寂滅。

此一段經。大略重頌諸佛權實二智。權智者。借事明理。借世間文字語言。以明無文字語言之實理。實智者。一切諸法之實體。文字不能彰。言語不能覆。無起無滅。無成無壞。非同暫借不實之道也。十方諸佛。往古諸佛。現今諸佛。未來諸佛。設教化。建法幢。度眾生。莫不皆以權實二智為化度門。然權智權設三乘。實智實示一法。而人皆不知諸佛本懷。諸佛本懷者。不徒自誇權實二智。單單欲露人人本具圓常覺體。大而更無有大。小而更無有小。初而更無有初。末而更無有末者也。蓋此圓常覺體。眾生迷而流浪六趣。諸佛悟而高超萬有。又此圓常覺體。眾生諸佛之本根。法界真如之實際。所以諸佛悟而常一。眾生迷而常萬。以常萬故。一切眾生卒不能會歸一佛乘。以常一故。十方諸佛竟不能散流眾生界內。舉如意云。會麼。若於此會得。權也是。實也是。權實總不是。權實總皆是。其或不然。須向父母未生前佛祖未開口已前。默坐自參。參來參去。工夫打成一片。當自大悟。窮諸玄辯。似一毫致於太虛。竭世樞機。似一滴投於巨



壑。其圓常覺體。本非語言文字可以指陳。如更遲疑。聽說山偈。本來圓滿大光明。迷自遷流萬不平。直下頓能開活眼。不須重演妙蓮經。問曰。諸佛重重開示。為甚麼諸人不悟。師曰。自你不悟。曰。既悟為什麼明日又講。師曰。雖是舊時天上月。一番觀看一番新。曰。通不舉著時如何。師曰。不免一生鶻突。曰。時時舉起時如何。師曰。杲日正中天。雲霞俱散盡。曰。正當恁麼時。還有不具眼者麼。師曰。講座案前圍裙。盲者亦不能見。曰。如何能同一佛眼。師曰。萬緣都放下。四相頓空來。

諸餘眾生類(至)一心共思求亦復不能知。

此一段經。頌實相妙法如眾生羅漢菩薩所不能知。蓋實相妙法。在山同山。而不與山同起滅。在水同水。而不與水同有無。如是乃至在萬物同萬物而不與萬物同生死。故曰。是法不可示。言辭相寂滅。舉如意云。會麼。若於此會得。便見得心同虛空界。示等虛空法。證得虛空時。無是無非法。不是鑿空說出。鳶飛戾天。魚躍於淵。上下昭著。不是無本之語。其或不然。須是向二六時中靜靜看個萬法歸一一歸何處。工夫打成一片。當自覺知一月普現一切水。一切水月一月攝也。猶是指東畫西。何故實相妙法觸事而真。擬之即差。言之即乖也。如更胸中窒礙未消。請聽山野說偈。法法本來無欠餘。不消於法強親疎。肯能直下空思慮。生佛何曾別兩途。問曰。猶是學人疑處。請向切要處併却咽喉唇吻頌四句。顯示實相妙法。師曰。併却咽喉閉却唇。十方諸淪許渾佛。當人切記渾淪裏。分二分三自失真。曰。恁麼則開口成雙槩。揚眉落二三。師曰。開口也是。揚眉也是。曰。如是。則但莫憎愛洞然明白兩句。便是祖師西來意。師曰。更聽說偈。佛祖相傳此個心。人人本具莫追尋。愚癡更問西來意。如挹黃金去換金。

又告舍利弗(至)世尊法久後要當說真實。

此十二句頌。大略只是言此實相妙法。唯佛能知。餘不能了。當生大信。佛語真實。且道大信信個什麼。良久。僧問洞山如何是佛。山云麻三觔。諸人還信麼。又僧問趙州如何是祖師西來意。州云庭前栢樹子。諸人還不疑麼。於此二事若是通不疑而生大信。則可謂截瓊枝。寸寸是玉。析梅檀。片片皆香。如或不然。疑心更起。縱有多智。如河沙數。一心思求。亦不能知。舉如意云。會麼。若於此會得。可謂道水不洗水。金不博金。又可謂人人頭上青天。元是一樣。個個脚下黃壤。豈別兩般。又可謂千紅萬紫雖然別。信道春風沒兩般。如更躊躇。聽說山偈。一覩明星悟徹來。十方諸佛眼同開。當人於此更分別。萬劫千生未可猜。問曰。經云當生大信。畢竟信個什麼。師曰。要信自己與佛無

二。曰。學人亦信。為甚麼不與佛一般。師曰。因你信不實。所以不與佛一般。曰。與佛一般時如何。師曰。唯佛知是相。十方佛亦然。曰。恁麼則迷則眾生悟則佛。不消更疑。師曰。更聽說偈。迷時悟後主人翁。諸佛眾生本一同。普勸諸人齊徹悟。千差萬別自然空。也不脫灑更聽說偈。迷時悟亦是真常。悟也元無第二光。徹底掀翻華藏海。十方諸佛共思量。

告諸聲聞眾(至)引之令得出。

此八句偈。頌佛初說種種法門。教人修行。有證聲聞者。有證辟支者。有證菩薩者。皆方便誘引。令脫苦離著也。蓋苦有多種。總之只三。著有多種。總之亦三。三著者。一我著。二境著。三情著。情著者。以被色聲香味等迷。留情不舍。故名為著。著即生苦。境著者。以不悟色聲香味等。當體即真。於此境上種種分別。取舍愛憎。故名為著。著即生苦。我著者。以不悟本具法身。大而無外。細而無內。前而無始。後而無終。認此父母所生形體為自己。以認此身為自故。則有生生死死之貪惡。上上下下之欣厭。以有貪惡欣厭故。則有無量之苦隨之矣。三苦者。一死苦。二刀杖苦。三不如意苦。不如意苦者。以不悟色聲香味等。具為夢幻。種種取著。取之不得。故名為苦。刀杖苦者。以貪色聲香味等。貪之不遂。遂生嗔怒。加以刀杖。作既有自。報亦必然。受他刀杖凌逼百種。故名為苦。死苦者。以有父母所生之形。必然有死。死則與世永別。不能後活此身。故名為苦。如是三苦三著。俱是不悟本具清淨法身。著於諸境。苦受百端。故諸佛大聖人種種方便。教化令離著脫苦也。舉如意云。會麼。若於此會得。十方坐斷。三際融通。諸佛不曾出世。眾生本不沉淪。其或不然。聽說山偈。人人本具圓明體。諸佛眾生總一般。自是不能離執著。難逃苦楚萬千端。問曰。如何是具足圓明體。師曰。能問者是誰。曰。恁麼則六根門首無人會。惹得胡僧特地來。師曰。錯認定盤星。曰。不錯認時如何。師曰。能問者便是。曰。古人謂之認識神。意旨如何。師曰。你有幾個識神。曰。恁麼則百年三萬六千日。返覆元來是這漢。師曰。放你三十柱杖。

爾時大眾(至)則生大歡喜。

舉爾時大眾至而今不知是義所趣。此一段經。科家謂之眾疑請問。眾疑則疑佛平日不自誇道德。今佛自誇道德智慧。非。三乘人所知。請問則問佛所得深智。願佛宣揚。再舉爾時舍利弗至難解之法。此一節經。科家謂之身子發問。再舉爾時舍利弗至欲聞具足道。此一節經。科家謂之重頌疑問。再舉爾時佛告舍利弗至則生大歡喜。此一段經。敘眾欲聞大法。佛不肯說。身子三請。

佛將為說。蓋此大乘妙法。即人人本具妙性。人人本具妙性。與十方諸佛歷代祖師了無毫髮間隔者也。世人迷此妙性。隨物變遷。所以有六道四生也。至人悟此妙性。轉物為己。所以有三身八解也。舉如意云。會麼。若於此會得。毛吞巨海。芥納須彌。轉萬物即是自己。似水投水。化自己即是萬物。如空合空。俱非難事。如其纖塵未消。不免山是山。水是水。毫髮不能相通。良久。還委悉麼。聽說山偈。眾生諸佛性無差。生既迷來佛乃誇。肯向今朝齊領悟。大家同駕白牛車。問曰。諸佛眾生不同。病在甚麼處。師曰。佛能克己。眾生不能克己。曰。恁麼則克己名為佛。師曰。縱不成佛。也是善人君子。曰。不克己皆如何。師曰。三途苦百端。曰。克己時如何。師曰。三身四智。八解六通。曰。講師答語為什麼與禪不同。師曰。你喚甚麼作禪作講。曰。講即高談闊論。禪即棒喝交馳。師曰。正是辯空華之濃淡。較兔角之短長。曰。如何是到家一句。師曰。聽說山偈。妙性人皆具一個。緣何東問復西慕。佛雖三止不須言。也是人情不會做。

法華大意卷上



廣陵寶城寺沙門 無相 說

吳興天池沙門 法聚 較正

長水平林居士葉祺胤 重較

爾時世尊告舍利弗(至)如是妙法。

此經向後科家謂之正說妙法。又有四科。初許說。再舉說此語時至默然而不制止。此兩行經。科家謂之上慢退席。再舉爾時佛告舍利弗我今此眾至願樂欲聞。此兩行經科家謂之眾淨誠聽。再舉佛告至如是妙法。此段經。向後方是正說。如是妙法四字。直指妙法全體也。舉如意云。會麼。於此領悟。會我相人相眾相壽相。如紅爐片雪。了無踪跡。消卵生胎生濕生化生。若大夢暫思。那討根由。鑄萬象總作一金。融萬古即是一念。到此田地。處處彌陀佛。家家觀世音。其或不然。須向靜中回光自照。此身乃父母之遺體也。那個是父母未生之自體乎。此心乃根塵之發知。那個是根塵未有之本心乎。如是參來參去。不計工夫。必有大悟時節。到大悟時。必當自信眼見之形相。妙法之全體也。耳聞之音聲。妙法之圓宣也。鼻嗅之香臭。妙法之至信也。舌嘗之滋味。妙法之醍醐也。如是乃至身觸意緣。鳶飛魚躍。雲行雨施。無有不是妙法之全體大用也。靈山一會。儼然不散。妙經宣揚。滿眼滿耳。到這裡且道還容註解也無。若許註解。須彌為筆。大海為墨。虛空作紙。經千萬億劫註亦不盡。若頓領悟。道個一念不起。猶是須彌山。豈許心意卜度。言語分疏者哉。問曰。妙法四字既是全體。且道離此四字之外喚作什麼。師曰。不許安名。曰既不許安名。諸佛全體為什麼云如是妙法。師曰。安名也安名。只怕人錯認。曰錯認時如何。師曰。我相人相。曰不錯認時如何。師曰。人空法空。曰恁麼則道馬非為馬。言牛未是牛。兩頭俱坐斷。中道一齊休。師曰。都講迴向。

諸佛如來時乃說之(至)欲令眾生入佛知見道故。

此段經。大略言此妙法不是尋常語言文字。雖有語言文字。乃宣揚妙法之語言文字也。此語言文字實非妙法。又再三誡之當信佛語。蓋妙法即當人妙心。若不信。是自棄耳。又曰。是法非思量分別之所能解。蓋思量便屬情解。自心之妙失矣。又曰。為一大事出現於世。如是。則大事即本妙心體。強名佛知見。既不許思量。從何領信。既信妙法。不許思量。却是望空而信。既望空而

信。信個什麼。蓋此實相妙法。雖語言道斷。心行處滅。亦不離語言文字也。故曰。文字顯總持。總持無文字。舉如意云。會麼。若於此會得。便信與三世諸佛共一心膽。便信與歷代祖師共個肚腸。七軸妙經。仰觀也看着。俯察也看着。三世諸佛。進前也相逢。退後也相逢。如其不然。須向靜中放下千斤名利擔。收回一點是非心。單單看個天地未曾判。父母未曾生。我今日能知能覺能喜能怒者畢竟在什麼處安立。忽然參透。當自大悟。無一物不是妙法全體。無一名不是妙法全號。到此田地。生死乃我心之活相。聖凡亦吾性之假名。苦樂逆順。水底月痕。動靜寒溫。天邊鳥跡。更何疑哉。問曰。如何是一大事因緣。師曰。諸佛為此出現。曰諸佛出現且止。如何是一大事因緣。師曰。講一月已來正為此事。曰講論已承妙語。且道如何是一大事因緣。師曰。老者安。少者懷。朋友信。曰孔聖以此三事為本懷。莫便是一大事因緣麼。師曰。且到此田地。再問一大事因緣。曰恁麼則從淺至深。從近至遠去。師曰。本無深淺遠近。曰如是則道曠無涯。師曰。也不是。曰如何即是。師曰。且回向看。

諸佛世尊唯以一大事因緣故出現於世(復講)。

此一科經。台宗謂之標出本意。即是標出諸佛出世一番的主意也。蓋吾佛大聖人普觀盡虛空遍法界。皆是一箇妙性。皆是一箇妙理。既是一箇妙理。即是一個妙心。既是一個妙心。即是一個妙法妙道也。以人人具足此性。既具足此性。即具足此理。既具足此理。則此心此法此道無不具足圓滿者也。但人不肯靜中自參究。自格窮耳。若肯靜中自參自格。則此本具妙性。何有不明。何有不悟。以人各各迷久。俱不自悟。吾佛大聖人乃出現於世。欲人人皆悟本具妙性也。欲人皆悟此性。所謂一大事因緣也。謂之一大事因緣。世間萬事萬物。大而天地。細而微塵。既屬有形。終成敗壞。既有敗壞。非吾妙性實相。既非妙性實相。乃是性中之妄念也。既是性中之妄念。亦非妙理實體。既非妙理實體豈是妙心妙道也。以此妙性。性一切而不異。妙萬物而至神。能為萬象主。不逐四時凋之物也。以此萬有。大而天地。細而微塵。起起滅滅。往往來來。故所以謂之小事。以此妙性。大而無外。細而無內。無起無滅。無往無來。故所以謂之大事。若知此為大事。則若身。若眷屬。若功名。若產業。乃至事業有天地之大。亦為小事。以世人不知此為大事。汨汨為身。只家火眷屬所累。既被此累。則不知本具之理。以豎窮三際橫遍十方也。舉如意云。會麼。更聽說偈。本具妙心。即妙性。聖人號做大因緣。諸人直下如明悟。不負西乾大覺僊。問曰。如何是直下明悟。師曰。眼空四海。神洞十虛。曰如何是妙性。師曰。非妙不能問。

非性不能言。曰恁麼則喜怒哀樂的主人翁便是妙性。師曰。認賊為子。曰中峰道即此與佛祖無間又作麼生。師曰。中峰即是。是汝不是。曰如何是妙性直捷一句。師曰。問處分明。答亦分明。不須更疑。

### 佛知見(再拈)。

佛知見者。即本具性妙覺體也。此性妙覺體。雖人人本具。迷背不知者極多。故十方諸佛出世開示。開示此性妙覺體也。歷代祖師傳授。傳授此性妙覺體也。蓋此性妙覺體。陰陽不能變。造化不能遷。虛空包不住。大地載不起。大地廣博為性覺中塵。虛空冲漠為妙體中隙。萬物眾多為妙性中間錯。古今遼遠為覺體中念慮。不可以相可以盡此妙性之相。故曰不可思議。不可以名可以正其覺體之名。故曰無有能得解。非思量分別之所解。非色相大小可以指畫。故曰唯佛與佛乃能究盡。仰觀俯察。遠取近求。無有不是其體。故曰體物而不可遺。上而諸佛。下而眾生。中而覺知。外而器界。俱元一體。故曰唯此一事實。餘二則非真。舉如意云。會麼。若於此會得。十方不隔。三世不遷。頭頭總是。物物全彰。無一名不是其名。無一物不是其物。說是麻三觔也是。說是栢樹子也是。鳶飛魚躍。多寶佛塔而見瑞騰祥。雨施雲行。妙莊王宮而放光散彩。其或不然。佛知見再參三十年。更聽說偈。能知能見處靈然。迷乃凡兮悟乃仙。我許當年圓悟老。一聲雞唱證根源。問曰。如何是根源。師曰。本具如是妙性。曰如何是妙性。師曰。舉似不得。曰既是本具為什麼舉似不得。師曰。舉似成兩個。曰恁麼則通不許開口。師曰。膠柱鼓瑟。釘椿搖櫓。曰如何是不犯鋒芒一句。師曰。山僧早晨洗面。摸著底不是他人鼻子。曰請聽學人說偈。自家靈妙古人心。多少愚迷向外尋。今日蒙師親點破。大千剎海變黃金。師曰。何不道剎海本黃金。

### 舍利弗是為諸佛(至)尚無二乘何況有三。

此一章經。大略只是言十方大聖人性道無有不同。往古大聖人性道無有不同。後來有大聖人性道無有不同。以無有不同故。當知人人本具之性理亦無不同。以人人之性理同故。當知物物之性理亦無不同。以物物之性理同故。仰觀俯察遠取近求性理無有不同。以無有不同故。當知知見亦無不同者也。或有不同者。非中心不同。乃各各自私自昧。自別自向。所以有萬不同也。苟能克去各各自私之執著偏邪。自昧之無明煩惱。自別之憎愛取舍。自向之苦樂逆順。則所謂一佛知見。一佛乘。一大事因緣之性理。無有不同者也。夫所謂一佛知見。一佛乘。一大事因緣。即人人本具之性理覺體也。蓋此覺體。論其大而更無有外。論其細而更無



有內。論其前而更無有始初。論其後而更無有終窮。圓融廣大。冲虛妙粹。稱之不能盡其言。故曰不可思議。窺之不能盡其際。故曰聲聞辟支佛所不能知。以此佛知見之體人人本具而不自知。故十方三世大聖人生大憐愍。出見於世。單單開示此佛知見。令人悟入也。舉如意云。會麼。若於此會得。便見十方不隔。三世道同。其或不然。則各各自偏。各各自昧。萬別千差之條貫。橫羅豎數之遍該。山僧不能把手與諸人拈出也。更聽說偈。頓空四相自忘機。此是如來妙總持。不爾更他求妙道。我知終與性非宜。問曰。如何自妙總持。師曰。當人妙性。曰經云非思量分別之所能解。和尚為什麼却道當人妙性。師曰。你道妙性是什麼物。曰出身猶可易。脫體道應難。師曰。你也不能道。曰學人脫體固不能道。請和尚道一句看。師曰。你起來。我回向。

舍利弗諸佛出於五濁惡世(至)於一佛乘分別說三。

此段經。大略只是言諸佛出世之由。蓋至理本寂。萬法本如。因眾生迷妄入心。不自覺知。如澄清水攪動不息。不覺渾濁。所以時漸澆薄。惡事日多。煩惱日增。差別之念日盛。紛紜之境日異。致感生死壽命日短。名為五濁。故吾大覺慈尊愍一切眾生流入苦海。展轉相因。無有出期。由是出見於世。以大方便。於一佛性理之中分別三乘。雖說三乘。終顯一佛乘性理也。舉如意云。會麼。若於此會得。便得本具妙性。前而無始。後而無終。何有劫濁之時。一即一切。一切即一。心境兩忘。何有煩惱濁之事道個法身一體尚落分疏。何有眾生濁之類。青青翠竹總是真如。鬱鬱黃花無非般若。何有見濁之相。不見有我人眾生壽相之體。前後際斷。可有命濁之生死。其或不然。更聽說偈。至體元無死與生。死生生死妄流行。當人直下能知本。依舊靈源一派清。問曰。如何是生死妄流行。師曰。不悟至理本寂。曰悟得至理本寂時如何。師曰。半夜松稍月。寒潭是對談。曰此莫便是學人棲心處也無。師曰。蝸篆求文義。時人何太愚。曰如何是超出言象一句。師曰。更聽說偈。壁上兩三行蝸篆。何人見處不分明。於中但問是何義。打失禪家正眼睛。

舍利弗若我弟子(至)非辟支佛。

此兩行經。諸佛大聖人出見於世的的本懷。只是欲要顯示人人本具圓滿覺性。如何謂之圓滿覺性。諸佛悟之謂之聖人。眾生迷之謂之凡夫。凡夫與聖人同一覺性。諸佛大聖人觀一切眾生皆此覺性而不自知。故生大憐愍。演此法華妙經。意欲人人皆悟此圓滿覺性。能悟此圓滿覺性。方名佛弟子。以名弟子。所得之道乃傳佛之道也。既稱佛之弟子。曰聲聞辟支而不明本具圓滿覺性。是虛名弟子也。菩薩。乃道學人也。諸佛出世。但教化道學之人。



既為羅漢辟支證果之人。當進學大學。方是學道人。而更不識菩薩所修行業。是為大謬。夫菩薩所修行業。不著一切相。不離一切相。念念純真。行行正等者也。行行正等。必至佛之無上正等。念念純真。必至佛之圓滿純真。既到圓滿純真無上正等田地。則當自信真如界內。絕生佛之假名。平等性中。無自他之影相。舉如意云。會麼。若於此會得。自覺無一法不是佛法。九流百氏。徒立名模。無一事不是佛事。三界六道。空生欣厭。綿州附子漢州薑。三周妙法。南山起雲北山雨。七卷玄談。其或不然。更聽說偈。宇宙中間理本同。不須同處別渠農。青山幾片白雲繞。已為諸人論色空。問曰。如何理本同處。師曰。著衣喫飯。曰恁麼則人人是佛不須疑。師曰。只怕生疑。曰生疑時如何。師曰。你衣我飯分千種。論是論非有萬端。曰不生疑時如何。師曰。截瓊枝寸寸是玉。折梅檀片片皆香。曰直捷一句作麼生道。師曰。若要直捷。請各無事。

又舍利弗(至)若不信此法無有是處。

此一段經。溫陵環師科為揀邪勸信。謂揀去邪妄狹小之心。勸信大乘。成一佛知見也。講論大略如此。山楚不敏。試再以佛知見三字拈一遍看。經云若不信此法無有是處。此法即佛知見也。夫佛知見者。即十方三世一切諸佛大聖人之知。大聖人之見也。蓋世人之知見有我人眾生壽者之差。有上下四圍之別。以有此差別故。順我者則喜。逆我者則怒。人不如我則生哀。我勝於人則生樂。以有如此百千萬億惡知惡見。故名下愚。或名不超脫。或名苦眾生。或名不如意。大聖人之知。知一切萬法皆一皆真。無始終。無向背之圓覺也。大聖人之見。見一切種種諸物即一心。即一性。無彼此。無分別之純真也。以有此百千萬億純善之知見。故名上智。名正等覺。或名世尊。或名大解脫。舉如意云。會麼。若於此會得。天地同根。萬物一體。諸佛眾生如水底月痕。地獄天堂似空中鳥跡。其或不然。更須向靜室中自看我此六尺之身。乃父母所生之身。長者不過百年而已。過此百年後。此身必同泥土草木。既同草木泥土。當知今日之能知覺者。今日之能談論者。畢竟在甚麼處安立。或再不悟。再看此身未生已前。元宋唐漢之際。乃至五帝三皇之上。今日之知覺。畢竟從甚麼處得來。於此看處忽爾頓悟。當自覺知太極我也。我太極也。前後際斷。上下界空。說個法身打成兩橛。道個一體已入分疏。嘆。更聽說偈。知饑知飽真如性。不屬六根并六塵。直下頓能參得透。從茲生死不相因。問曰。如何是知饑知飽真如性。師曰。你問者便是。曰既是人人具足。物物全真。眾生諸佛為什麼聖凡不等。

師曰。因他不見性。曰見性時如何。師曰。你也無問。我也無說。

除佛滅後(至)便得決了。

佛未出世。此法華經隱於天地萬物。佛既出世。此法華經顯於佛口。佛既去世久矣。此法華經便是佛口親傳。若不見此法華經。即是不聞佛語者也。若不見此法華經。即是不見佛相好者也。故曰除佛滅度。見前無佛。此經乃佛也。能持此經解此經。即是見佛聞法。以此經即如來前身。即諸佛慧命也。舉如意云。會麼。若於此會得。靈山一會。儼然未散。釋迦世尊共多寶佛在寶塔中正談妙經。天雨四花。馥郁柔軟。地搖六震。畏愛敬仰。我等親受記莚。不待當來。法界同成正覺。豈容他日。其或不然。須向靜室中焚香獨坐。看個不思善不思惡正恁麼時那個是自己本來面目。如是久久工夫打成一片。必當自悟我心之念。念因境生。諸境紛紜。還因心覺。心境之外。靈心本正。心寂念滅之時。是名寂滅。此寂滅體。即諸佛之心宗。諸祖之法要。更何疑哉。或更躊躇。聽說山偈。靈山一會儼然時。妙法何人是受持。我許趙州云栢子。清光千古照離微。問曰。學人不會。再請說偈。此經即是此心妙。心妙蓮經遍十方。普請諸公俱著眼。塵塵諸佛放毫光。曰既是塵塵有佛放光。為什麼人不能見。師曰。不是不見。人不願見。曰願見時如何。師曰。再聽說偈。肯思見佛修諸善。思見三途惡百端。有個道人俱不見。蓮華遍界不相瞞。曰學人愚拙。望師直指。師曰。若要直指。守戒念佛。曰和尚幸是禪宗。為什麼枷鎖自累。師曰。你不怕枷鎖。破戒妄想。曰中道一句乞師指示。師曰。且守念佛看。

舍利弗汝等當一心(至)唯一佛乘。

四維上下曰宇。古往今來曰宙。宇宙中間一理而已。理一則性一。性一。則所謂一佛乘。一佛知見。一覺體。無有不一者也。今吾佛大聖人宣示此一佛乘。一佛知見。一覺體。要當信受。若不信受。是自昧己靈者也。又吾佛大聖人於一切法上。無不知其根蒂。無有不知其最初。無有不知其終窮。如是乃至死此生彼。前因今果。名字相狀。國土鄉井。變化情思。無有不窮其諦實也。故其語無虛妄。我等當諦信受持。若不諦信受持。是自欺其心。自失其大利也。舉如意云。會麼。若於此會得。如目視杲日。似耳聽轟雷。其或不然。須向六和堂內。一念萬年。萬年一念。工夫純熟。打成一片。則當自知如饑欲食。不必更問他人饑與不饑。可食不可食者也。故諸佛出世。諸祖闡揚。無不為此一法。更無他法。諸三乘人不知此一乘道者過在於何。在於不知一也。以不知一。故雖不造惡業。終是我相未忘。分別之念不息。

以不能忘我并分別念。故憎愛取舍之根不能淨盡無餘也。咦。聽說山偈。萬象紛紛本有根。如來指出感深恩。眾人不信是自昧。劫石難消苦未伸。更聽一偈。吾師示我我之心。諦信從茲不外尋。既不外尋歸自己。純然觸目是黃金。問曰。經云受持佛語。如何是佛語。師曰。今日講的是法華經。曰恁麼則人人皆聽受。個個莫生疑。師曰。一道孤光。寒潭萬丈。曰學人不會。再聽直示一句。師曰。若要山桡直示。今日講的是法華。

**爾時世尊欲重宣此義而說偈言(至)故為說大乘。**

此十四句偈。重頌法華會上退席之眾。言其俱是糟糠不實。無福之人。再舉此眾無枝葉至舍利弗善聽。此三句頌。世尊自喜五千退席。無有枝葉。唯是真實。可當善聽。再舉諸佛所得法此一句。直指妙法全體也。再舉無量方便力至優婆提舍經。此十六句。頌諸佛出世。皆權設方便。三乘種種法門。隨眾生情。非實法也。再舉鈍根樂小法至以故說是經。此十八句偈。頌一佛乘。一佛知見為本。其餘九部皆方便權設也。再舉有佛子心至故為說大乘。此十四句頌。說法華妙經之由。蓋法華妙經即人人本具妙性。以此妙性不明。被種種情欲所累。情欲既累。妙性愈隱。故吾佛大聖人出見於世。雖種種方便開示。主意為顯此人人本具之妙性也。如何謂之妙性。妙性即人人本心之理。以此人人本心之理。大而無外。細而無內。前而無始。後而無終。豎窮三際。橫遍十方者也。舉如意云。會麼。若於此會得。大乘小乘。空中鳥跡。佛法世法。水底月痕。盡虛空界是箇自己。即自己性是箇法界。水投水而無異。空合空乃一般。到此田地。且道還有佛可說法麼。咦。聽說山偈。打破虛空即本真。頭頭物物是全身。當人更欲求方便。依舊蓮華紙上塵。問曰。如何是非紙上的蓮經。師曰。有耳不能聽。有口不能談。曰恁麼則今日講演俱是妄語。師曰。也妄也不妄。曰妄即如何。師曰。一切有為俱屬生滅。曰不妄時如何。師曰。一切有為俱是實相。

**聲聞若菩薩(至)皆成佛無疑。**

此四句偈。頌大道之相。無相可相。大道之名。無名可名。以無名可名故。雖曰圓覺曰法身曰太極曰佛性曰上天。皆紙上之畫。口中之言。大道至理終不能彷彿於萬一也。以無相可相故。雖三十二大人相。八十種隨形好。乃至三千威儀之進退。八萬細行之出處。皆有生滅。有去來。有成壞。有取舍之迹。大道全體。亦終不能形狀於萬一也。大哉大道。豈容易領悟乎。由是吾佛大聖人生大憐愍。直指大道全體即人人本具妙性。演此妙性之理曰妙法。喻此妙法曰蓮華。以本具妙性。大而無外。細而無內。色空無間隔也。前而無始。後而無終。古今無間隔也。以空色無間



隔。故仰觀俯察。遠視近思。無有不是自己妙性至體也。以古今無間隔。故威音那畔更那畔。彌勒後來更後來。無不是自己剎那真際也。三乘向外馳求。故轉求轉遠。一乘直指自性。故成佛無疑。舉如意云。會麼。若於此會得。皆成佛無疑。其或不然。更聽說偈。自家一個古毗盧。不悟還應是自疎。直下頓能親會得。此經闡演亦成迂。問曰。如何是古毗盧。師曰。描不成。畫不就。曰描不成畫不就畢竟是什麼物。師曰。我欲安名。恐人錯認。曰恁麼則無名無相真如性。有說有思大道塵。師曰。更聽說偈。無名無相真如性。有說有思大道塵。個裏不須分黑白。曾來大道絕親疎。問曰。恁麼則大道全體。鶻突一片。師曰。只怕不肯鶻突。肯鶻突。道理自明。曰如是則識得一。萬事畢去。師曰。善哉丈夫。

### 十方佛土中(至)來世得作佛。

此七句偈。頌諸佛出世唯說一乘。再舉諸佛出於世至濟度於眾生。此五句頌。言諸佛出世本懷。再舉佛自住大乘至皆令人佛道。此二十八句。頌大聖人之心平等至仁。普欲人人同悟。無揀擇也。再舉若我遇眾生至迷惑不受教。此四句。頌眾人見小。佛不便說大乘也。再舉我知此眾生至是亦非真滅。此三十句。頌眾人見小不堪受教。佛乃方便。說變粗形為細質。易短壽作長年之涅槃小果也。再舉諸法從本來至來世得作佛。此四句。頌萬法本寂。但人自鬧耳。蓋人人本具實相妙體。即易所謂太極。本教所謂圓覺也。知此則名為知道。行此則名為行道。證此則名為證道。不知此則不足謂之知道。不行此。不證此。俱不名為行道證道者也。何以如此。蓋此實相妙道。著實而無虛妄之神妙道理也。此理即人人本具之天理也。既知此道。成佛無疑。故行此道。來世作佛也。舉如意云。會麼。若於此會得。十方不隔。三世融通。無一名不是此道之名。無一物不是此道之物。其或不然。須向蒲團上默坐自看。看箇萬法歸一。一歸何處公案。久久工夫純熟。打成一片。方自信道真如界內。絕生佛之假名。平等性中。無自他之形象。如更躊躇。聽說山偈。自家一個古彌陀。聲色頭邊蹉過多。我佛與人親指出。光明從此照娑婆。問曰。如何是古彌陀。師曰。能問者便是。曰古人謂道語忌十成意旨如何。師曰。大道本無忌。曰恁麼則今日知覺即是古佛全體。師曰。更消細問。曰學人便如是承當。只恐認賊為子。師曰。你有幾個能問底心。曰只一個。師曰。你又道認賊為子。曰如是則木人半夜穿[革\*(華-(十\*| \*十)+(人\*| \*人)))]。石女天明戴帽。師曰。唵嘛呢叭彌吽。

### 我有方便力(至)皆已成佛道。



此八句。頌諸佛出世雖有多種教誨。主意為一佛乘而設也。再舉過去無數劫至令人於佛道。此十二句。頌過去大聖人之道無有不同證同知。人人本具之理性亦無不同證同知者也。再舉又諸大聖主至助顯第一義。此六句。頌諸佛知眾生有種種好樂。故設種種教法。實則一佛乘也。再舉若有眾生類至皆已成佛道。此八句。頌往古聽法華之人。以聽法華經故。悟得本具妙性。豎窮三際。橫遍十方。以悟自性廣大圓滿故。即知自己與十方諸佛同一妙心也。以同一妙心。故凡修布施持戒等行皆妙行也。以修如是妙行為因。今皆成佛。乃必然之理也。蓋因該果海。果徹因源。因果雖遼。性體則一。(相)才雖不敏。悟亦有宗。試再以性之一字拈一遍看。蓋性之一言。在諸佛大聖人闡教度人之地謂之道。在天地萬物紛紜變化各有一定之理謂之理。在各人自認為我之心謂之情。在各人克我以順眾人之性謂之善。在各人為己以作害人害物之業謂之惡。大聖人於此善惡兩途。方便勸化。譬喻曲引。令其從善。謂之經典。一切人不信。念念造惡。失自本性。謂之闡提。闡提即無信人也。如是種種。千門萬戶。教化名字。皆為一個性字不明。有如是說也。性若明。佛也不須出世。祖也不必西來。舉如意云。會麼。若於此會得。便見十方不隔。三世道同。揚眉掉臂。妙蓮經聲若轟雷。咳嗽擡頭。無上道相如杲日。其或不然。更聽說偈。著衣喫飯人人會。何故自家性不明。自性但明皆是佛。明心不必聽蓮經。問曰。如何是性明一句。師曰。諸惡莫作。眾善奉行。曰如是則作善名為見性。作惡名為不見性。師曰。靜中自思自性是欲樂邪欲苦邪。曰自性欲樂。師曰。既自性欲樂。不得教他受苦。曰恁麼則率性是道。師曰。車不橫推。理不曲斷。

諸佛滅度已(至)皆已成佛道。

此十八句。頌諸佛闡教莫不明此妙性心。既明此妙性心。則所行之行皆妙行也。所行皆妙行故。大而六度四諦萬善。微而戲笑合掌。一皆成佛妙行也。何以如此。蓋人人本具妙心。圓裹三世。融徹十方。一即一切。一切即一者也。以不悟此妙心。故流轉六道。往返無窮。從迷至迷。古今不已。今法華妙經。諸佛之心宗。千經之管轄。一心之元鑑。實相之妙門。既而得聞。心乃妙心。性乃妙性。行乃妙行也。以行皆妙行故。行即真如。性乃妙性故。當體是佛。心即妙心故。計較思量。度。皆般若妙經。到此田地。鳶飛魚躍。與四十九年演教無殊。舉手低頭。共三百餘會談經不異。更何佛道而不成。更何眾生而不度。其或不然。須向靜中看個父母未生以前畢竟是何面目。忽然頓悟。方知得山河及大地。全露法王身。其或更有思量。可聽山僧說偈。頓悟妙心

心即佛。不須修習不須成。低頭合掌已成佛。也是隨他換眼睛。問曰。如何是即心是佛之妙。師曰。闍黎是佛。不可生疑。曰學人不疑。為什麼不得成佛。師曰。為闍黎不成佛。正是疑處。曰恁麼則萬緣消盡。一性圓明。師曰。更聽說偈。本來成佛不須疑。不信分明是自欺。只若不疑并篤信。白毫光照五須彌。曰本來成佛還假莊嚴也無。師曰。更聽山偈。一道寒光照碧空。非莊嚴處妙嚴重。此時更問莊嚴事。眼不盲兮耳不聾。

#### 未來諸世尊(至)亦同得此道。

此十四句偈。頌未來無量大聖人道同。以道同故。設法教化度人。無有不同者也。所以同者何。蓋此道在天地萬物均謂之理。以均得此理故。經萬萬世無窮。天地萬物還是今日一般。無少易也。此道在人均謂之性。以均得是性故。雖死此生彼。生此死彼。經萬萬世無窮。亦還是今日一般。無少謬也。此道在於本土堯舜周孔謂之中和明德。人人能致中和。圓明德。則無有不是堯舜周孔也。此道在於吾佛大聖人。謂之妙法。故若有聞法者。無一不成佛。其或不然。請聽山偈。人人本具真如性。千聖曾來只一般。於此一般真領悟。千差萬別不能瞞。問曰。如何是無漏智。師曰。你即今漏在那邊。曰中道亦不住。師曰。中道既不住。你漏我不知。曰頓悟妙法則無所不知。為什麼學人漏處不知。師曰。更聽說偈。無漏難思智甚深。宜於靜處自追尋。忽然追到無追處。萬古元來只個心。

#### 未來世諸佛(至)其實為一乘。

此四句偈。頌往古諸佛如此。現在諸佛如此。未來諸佛亦如此。皆如此者何。以人人均具此性。既均具此性。則均具此心。此性此心既同。則諸大聖人出世闡化。亦無有不同者也。諸大聖人闡化事迹既同。則大聖人主意為一大事亦無不同。(相)才疎學淺。悟亦有宗。不避煩引之譏。試再以一大事拈一遍看。夫一大事只是個性字。蓋性之一體。無有形相。難以言說。在知覺處喚作心念。在塵境處喚作事務。在開示處喚作教典。在逆人之性處喚作惡業。在順人之性處喚作善行。在死生交接之際。不悟喚作憂苦。悟徹喚作自在。在憎愛取舍之時。不悟喚作牽纏。悟徹喚作解脫。在萬有紛紜境上。悟徹喚作一法身。一佛知見。一佛乘。不悟則喚作四生業網。三界火宅。六道塵勞門。如是乃至千差萬別。苦樂升沉。無不在此性之所而易其名也。諸佛大聖人獨先自知此性之全體。故謂之一大事。愍人之不悟。故開示令人悟入。謂之佛知見。大學格物格此也。中庸率性率此也。諸佛圓證證此也。眾人自迷迷此也。以迷此故。六道往返。自苦自樂。無有了期。以證此故。三界自在。無是無非。有何窮極。舉如意云。會

麼。若於此會得。萬物一馬也。何真何假。天地一指也。孰是孰非。其或不然。聽說山偈。樂哀逆順中於覺。迴脫根塵曰妙心。會得了然為大事。圓通自在號觀音。問曰。如何是一乘。師曰。你即今有幾個乘。曰覓個一亦不可得。師曰。你適來又問如何是一乘。曰恁麼則十方薄伽梵。一路涅槃門。師曰。見性之人無此情解。曰如是則但離妄緣。即如如佛。師曰。離妄二字。費力不少。曰如何是省力一句。速道。師曰。山僧今日講似勞碌。

### 諸佛兩足尊(至)導師方便說。

此八句。重頌佛說一乘之本意也。蓋諸法無自性。自性離生滅。言語道斷。心行處滅。不容有所言。而能顯示全體全用之妙也。以諸佛大聖人不欲斷此佛種。宣示一乘。雖欲說一乘。不能直道。故以種種方便而宣示之。夫一乘者。即人人自性之全體全用。無二法也。舉如意云。會麼。若於此會得。森羅萬象。自性堂堂。大地山河。真常密密。觸事而真。擬心皆佛。更何疑哉。其或不然。須向靜中回光返照。與蒲團打合。看個一歸何處話頭。看來看去。若道一有所歸。即成二法。若道一無所歸。一從何起。如是工夫。久久忽然頓悟。方信道我之妙性。本與十方諸佛歷代祖師。無少間隔也。但以自昧。以自昧故。於此本同體上起人我見。生順逆心。以有人我見故。逆順之心不可窮極。以有逆順心故。人我之相不可窮極。嗚呼。欲還一佛乘。何可得也。故佛於眾人中獨先覺此妙性大而無外。細而無內。前而無始。後而無終。豎窮三際。橫遍十方者也。舉如意云。會麼。若更疑擬。聽說山偈。自家性必自家知。何事求之曰未歸。既曰聰明英俊士。當於此處莫遲疑。問曰。既是自家性必自家知。何以古人三登投子。九上洞山。方明此事。師曰。三登投子。九上洞山。正是騎牛覓牛。曰恁麼則咳嗽掉臂。無不是西來的意也。師曰。古人道無量劫來生死本。痴人喚作本來人。正是你等。曰迴脫根塵不拘文字。請師道一句。師曰。道即道一句。只恐你落在根塵文字。曰落在根塵時如何。曰道馬是馬。言牛是牛。曰不落根塵如何。師曰。道馬元非馬。言牛未是牛。曰學人轉問轉生疑。請師直捷道一句。師曰。洞山麻三斤。趙州栢樹子。再莫生疑。

### 天人所供養(至)皆令得歡喜。

此二十六句。重頌現在十方佛與釋迦佛說法。皆以方便發明個性字。性即佛乘。(相)才荒學淺。悟亦有宗。試再以佛性拈一遍看。夫性者。即各各自心之理。此理至公至平至明至大至一至圓。所以有不公不平不明不大不一不圓者。非性不圓不一不大不明不公不平。乃各各自私自偏。因於六根。縛於六塵。拘於六識。所以不能至公而無偏私。至平而無高下。至明而無蒙昧。至



大而無狹小。至一而無雜亂。至圓而無欠缺者也。吾佛大聖人出現。與十方殊國大聖人出現。俱最先覺悟。闡揚教法。雖教法有種種不同。所以顯示此性之全體妙用則無不同也。舉如意云。會麼。若於此會得。即自己性與十方大聖人性。似水投水。即十方大聖人性與自己性。如空合空。大千界總是黃金。微塵國通為白玉。徹上徹下光明燦爛。即理即事正等圓圓。到此田地。說甚麼了與不了。悟與不悟。其或不然。聽說山偈。乾坤萬物性通該。性一休癡向外猜。我許一歸何處答。青州衫子價高擡。問曰。青州衫子價高擡。學人通不會。師曰。難得個不會。價值千金。曰價值千金是甚麼物。師曰。不是頭上帽。亦非脚下鞋。曰畢竟是什麼物。師曰。我怕你不信。不敢說。曰。和尚誠言。焉敢不信。師曰。既能諦信。決定是你。曰甚麼則人人有一面古鏡。照天照地。師曰。切忌安名。曰安名時如何。師曰。四聖六凡空裡華。終是不實。曰不安名時如何。師曰。三身四智性中體。萬古圓融。

#### 舍利弗當知(至)而起大悲心。

此十六句頌。科家謂之原始開權。謂佛始初成道。觀眾人機見狹小。無有福慧。乃漸漸引誘。至於一乘之意。蓋六道眾生雖若升沉不同。入生死險道則同也。何以謂之險道。以人人本具妙性。圓裹十方。融貫三際。無死此生彼之殊。無苦我樂他之別。以不悟此性故。妄執我見。固守夢形。從苦入苦。從冥入冥。卒無自了之期。故謂之險道。吾佛大聖人乃起大慈悲心。以種種因。種種緣。開其正眼。曰莫認此身。此身不久。莫貪此樂。此樂苦因。百年如水上浮漚。六境若雲中掣電。當認法身。法身乃自性之本身也。無死生之變。無苦樂之更。圓常湛寂。明妙冲虛者也。舉如意云。會麼。若於此會得。十方不隔。三際融通。自絕犛牛愛尾之弊。自空子蛾投火之愚。大而無外。共十方諸佛一口宣揚。細而無內。同歷代祖師一心湛寂。其或不然。須向靜中自看。此身四緣假合。散開則元無自性。此心六塵假靈。消滅則元無自體。如是返復籌度。畢竟那個是我不生不滅常住本來面目。如是久久工夫做到。自有到家時節。咦。更聽說偈。萬有紛紜各自身。為無佛眼各分神。肯能直下知根蒂。生死何常見屈伸。問曰。如何是無佛眼。師曰。見有千差萬別。曰有佛眼時如何。師曰。等閑識得東風面。萬紫千紅總是春。曰恁麼則諸佛見一種。眾生見兩般。師曰。真具佛眼。一種也是。兩般也是。曰如何是了了不疑一句。師舉如意云見麼。

#### 我始坐道場(至)法僧差別名。



此十句。頌佛既得道已。思眾人愚迷。如何可度之意。再舉爾時諸梵王至請我轉法輪。此八句。頌諸天仙眾請佛轉法輪之意。再舉我即自思惟至疾入於涅槃。此八句。頌若說妙法。人必不信。不如不說之意。再舉尋念過去佛至但為教菩薩。此二十二句。頌十方佛勸佛欲化眾生。當方便演說三乘之意。再舉舍利弗當知至法僧差別名。此十八句。頌吾佛大聖人開權顯實之意。試再以權實二法細拈一遍看。夫權者權變。以能反常合道。故名權變。如至體無生死。而身自生死。乃權教之曰。此身不久。命光遷謝。當究不生不死圓常之體。如至理湛寂。本無是非。而世事紛紜。却有是非。乃權教之曰。一切有為之事。終歸空寂。當究無是無非廣大之妙。如是乃至其小者教其令大。至鄙者教其令高。其狹者教其令廣。其苦者教其令樂。皆名權也。實者實乘。以能真如無妄故名實乘。如人人本具妙性。歷萬世而不遷。主萬象而不別。冲虛妙粹。炳煥靈明。無去無來。不生不滅。非大非小。乃一乃萬。不可以智知。不可以識識。諸佛大聖人證此謂之正等。萬古大聖人持此謂之中庸。眾人迷此謂之生死海。知明識此謂之淨法身。舉如意云。山僧也不知此。也不識此。也不迷此。也不證此。且道喚作什麼。咦。聽說山偈。自家心性自家知。何必如來著力提。著力既提提醒後。大千無處不光輝。問曰。如何是自家心性。師豎拂子云。會麼。曰。恁麼則觸事而真。不須擬議。師曰。天際日上月下。檻前山深水寒。曰。學人不會。師曰。用會作麼。曰。如是則拈來無不是。用處不生疑。師曰。你還記得話頭麼。僧禮拜云。蒙受記。

#### 從久遠劫來(至)悉亦當作佛。

此四句頌。總結方便開權之意。再舉舍利弗當知至今正是其時。此十二句。頌說法日久。眾人心純。將說妙法。顯此妙性之意。再舉舍利弗當知至但說無上道。此八句。頌福薄智小者不信此經。此人既退。當正直說之意。菩薩聞是法至悉亦當作佛。此四句。頌既遇如來正修行路。根無大小。皆成佛果之意。(相)才雖不敏。悟亦有宗。試再以悉亦當作佛一句重拈一遍看。夫妙道大體。即人人本具妙心。此心不屬有知。不屬無知。不屬有相。不屬無相。五蘊四大。假立空華。三身十力。妄號十體。到此田地。求個生死。大似水底月痕。問云。人我還如空中鳥跡。舉如意云。會麼。若於此會得。日月燈明佛。是自已圓成。妙法蓮華經。元非聽聞他語。其或不然。須是向蒲團上屏息諸緣。單單提個那個是父母未生以前本來面目。參來參去。自有大悟。到大悟時。鳥啼華笑也是本來面目。山青水綠也是妙法蓮華經。還知此意麼。咦。太湖三萬六千頃。月在波心說向誰。問曰。經云悉亦

當作佛。且道今日聽法有幾人成佛。師曰。不聽者不成。曰學人亦聽。為什麼不成佛。師曰。為你信不及。曰信得及時如何。師曰。無明實性即佛性。幻化空身即法身。曰恁麼則本自圓成。自生疑惑也。師曰。如是則我不敢輕於汝等。汝等皆當作佛。

### 如三世諸佛(至)說無分別法。

此四句。頌佛佛道同也。蓋凡聖雖殊。性理則一。以性理一故道理亦一。以道理一故。東方聖人。南方聖人。西方聖人。北方聖人。所談之道。則無不一也。以四方道同故。乃至過去萬萬古之前。道亦是一。以過去道同故。乃至現在至未來萬萬世之後。道亦是一。以三世道同故。吾佛大聖人所談之道亦無不同。故云說無分別法。舉如意云。會麼。若於此會得。圓陀陀地。自不分兔角之短長。平坦坦中。自息辨空華之濃淡。鳶飛魚躍。全影色身而法身。竹翠華黃。全露無極而太極。其或未委。須把世緣妄緣。拋向那邊更那邊。再以聖念凡念。頓息令絕更令絕。直得心如墻壁。身若虛空。到恁麼田地。單單念句阿彌陀佛。此念佛之外更無別念。除此念佛之心更無別心。如是久久。工夫成片。道自無間。理亦自一。理既一故。則當自悟真如界內。絕生佛之假名。不是虛語。平等性中。無自他之影相。不是空談。從此向去麻三斤栢樹子廬陵米趙州茶。信手拈來。信口道出。一一耀天鑑地。一一耀古騰今。咦。更聽山偈。人人具足真如性。法界何嘗間自他。自是當人私執著。累吾黃面老爺爺。累吾黃面老爺爺。方便門前說有車。普請今朝同著脚。勿教生死又來華。莫教生死又來華。念句彌陀掃蕩他。掃得盡時生死盡。十方何處不蓮華。問曰。如何是何處不蓮華。師曰。處處彌陀佛。家家觀世音。曰恁麼則十方不隔。三世道同。師曰。何消附會。曰不附會時如何。師曰。大海從魚躍。長空任鳥飛。

### 諸佛興出世(至)遇於優曇華。

此十八句。頌佛之大法難聞也。既聞。信之亦難。以天地成立以來。不知經幾年歲有一佛出世。如本土以十二萬九千六百年為一元。則過七萬五千餘歲。纔有佛之聲教。佛則未聞有也。故曰諸佛興出世。懸遠值遇難。又如佛出世四十二年之後。始說法華。故曰正使出於世。說是法復難。又如山僧以輪迴因果。乘之前而莫知其始。以未聞此之妙法故。尚存凡地。今乃得遇得聽。乃至講說此經。此經豈容易聽聞講說乎。故曰無量無數劫。聞是法亦難。能聽是法者。斯人亦復難。舉如意云。會麼。若於此會得。十方諸佛一齊出現。演大法輪。歷代祖師一齊悟道。傳授心法。融古今於一念。物物皆清淨妙身。會剎海於毫端。事事即真如實際。其或不然。請向靜室中焚香默坐。看個萬法歸一公案。久久

工夫打成一片。當自覺知虛空無面目。不用巧粧眉。本自圓成無欠少也。如更躊躇。聽說山偈。妙道何曾離自心。心心不用外邊尋。回光直下知端的。瞬目揚眉總妙音。問曰。如何是打成一片。師曰。絕喜怒哀樂。無意必固我。曰恁麼則但離妄緣即如如佛。師曰。如煎礦法。雜石既去。金乃自精。曰學人從此一志念佛時如何。師曰。如世優曇華。人間真少有。曰多見念佛人臨終無下落時如何。師曰。既無下落。還不曾念佛。曰請省力處道一句看。師曰。但念阿彌陀佛。

**汝等勿有疑(至)無聲聞弟子。**

此六句經。正頌天下無二道。聖人無兩心也。蓋天地同根。萬物一體。以天地同根。萬物一體故。更不須疑十方大聖人有兩樣心。更不須疑往古來今大聖人有兩樣道。道即法也。又云一乘。經云無聲聞弟子者何。蓋聲聞聞聲領悟。道似在他。得道既在他得。則有授者得者。以有得授故。我人之界聳然。既有我人之界。大道全體於是乎大謬矣。更說什麼大道一乘。故云無聲聞弟子。舉如意云。會麼。若於此會得。仰觀俯察。溥博淵泉。遠取近思。於穆不已。遍十方是箇大光明藏。若夾路桃華風雨後。馬蹄無處避殘紅。極三際是個安養世界。若等閑識得東風面。萬紫千紅總是春。其或未委。還須與蒲團打合。冷坐一二十年。孜孜以斯道為急務。單單看個父母未生前本來面目。工夫做熟。忽地打開千聖橐籥。當自知得佛一我也。我一佛也。萬物一我也。我一萬物也。更何疑哉。聽說山偈。宇宙中間一理通。何須一外別青紅。流分萬派眼皆見。鳥嘯千般耳豈聾。米價大家親領得。酒錢未必我雷同。試將此道眉掀看。魚躍鳶飛俯仰中。問曰。如何是魚躍鳶飛。師曰。上下昭著。表裡洞徹。曰恁麼則道無時而不在。道無處而不然。師曰。曾來千聖悉同途。曰學人便如是會得時如何。師曰。早知燈是火。飯熟已多時。

**汝等舍利弗(至)廣讚一乘道。**

此十六句。科家謂之流通法說。謂當廣讚一乘妙法。破五濁之痴迷也。以五濁惡世人皆著於世欲。終不自悟而求自性之真道也。自性真道即一佛乘。又謂之佛知見。蓋此妙性。人人本具。個個圓成。但以不能克去我執之私。所以終被我相之所籠罩。故與大道全體漸遠。橫生妄見。亂起邪思。以有如此惡覺。故三界之苦惱熾然。四相之奔波競起。欲復自性之真何可得乎。吾佛大聖人以法界為自性。以萬有為自身。出現於世。雖說三乘。權開方便。然終為一佛乘而說也。舉如意云。會麼。若於此會得。求個一之實體尚不可得。說什麼四濁五濁。求個一之實乘亦不可得。論什麼二乘三乘。其或未然。更須放下更放下。掃蕩更掃蕩。專



專舉個無滋味話頭。工夫做熟。必當有悟。夢裡明明有六趣。覺後空空無大千。到斯田地。說個三界。水底月痕。說個四相。空中鳥跡。咦。聽說山偈。頓悟真如實相門。門門本不立墻藩。是非窩裡蓮華綻。凡聖場中正覺純。幾處笛聲驚世夢。一窻月色見天根。許誰於此同肝膽。謾唱山謠擊瓦盆。問曰。如何是擊瓦盆之義。師曰。隨流認得性。無喜亦無憂。曰恁麼則不思而得不勉而中。師曰。始是道人行履。曰學人便如此行將去時如何。師曰。不為分外。

### 舍利弗當知(至)自知當作佛。

此十二句頌。言十方三世一切諸佛。最初皆以種種因緣種種譬喻開示人人本具之妙性。末後皆各各領悟。各各證入。圓滿人人本具之妙性者也。佛既開示。人既悟入。則本具之妙性。自覺前前無始。後後無終。大大無外。細細無內。以如是故。愈覺生死如天上雲生而天本淨。愈覺苦樂如鏡中像現而鏡本明。到此田地。四生夢幻。三界空華。聞復翳除。塵消覺淨。眾生界盡。煩惱事空。成佛多時。度人已畢。更何疑哉。舉如意云。會麼。法說一周今日了。譬喻明日又重宣。兩重公案直參透。頭上何人不是天。問曰。法說一周。今日既畢。頓成佛道。却有幾人。師曰。只你一個不成。曰恁麼則學人不成。師曰。不是不成。只是不肯成。曰肯成時如何。師曰。一拳拳倒黃鶴樓。一踢踢翻鸚鵡洲。有意氣時添意氣。不風流處也風流。曰不肯成時如何。師曰。今日復明日。明日何其多。少壯不努力。老大將如何。曰吾師答語何太逼切。師曰。勸君更盡一盃酒。西出陽關無故人。曰恁麼則聞此法者便當成佛。師曰。聽說山偈。百年何苦百年瞞。百歲渾如夢裡觀。夢裡百般知是妄。便當今日把心寬。曰直下成佛一句再乞師指示。師曰。更聽說偈。乾坤大道本圓成。水自綠來山自青。更欲向人尋究竟。信知無雨是天晴。

### 譬喻品第三

此一品名譬喻者。以上根利器。皆於法說一周。已得開悟。既得開悟。各謂自性本自圓成。以各謂自性本自圓成。故佛乃授記。授記者。授記於當來我相克盡。必成佛道。欲成佛道。必克我相者。以自性雖本來清淨。因不守自性。流入諸趣。展轉執著。我相愈熾。我相既熾。則所謂本來清淨漸失矣。匪憑大聖人先覺斯道。開大道路。則一切人終無有超出之日。終不能頓悟自性本自圓成。以大聖人先覺斯道。重重開示。重重導引。人既領悟。自知作佛。乃記其必得成佛。更何疑哉。然則到此田地。仍復不曉。即中下之品。佛乃愍之。故說火宅品喻以告之。蓋火宅者。大火洞燒之大宅也。三界生死苦相如之。故取為喻。(某)才雖不



敏。悟亦有宗。試再以火宅淺小拈一遍看。夫萬物眾多。且置之而弗論。只如為人在世。百年如朝露。千足若春霜。死之後。縱堆金以為墳。不過富埋身之具。堆金於我何益乎。死之後。縱名標鳳閣。更不知名隨形朽。標名於我何榮乎。所以智者眼空四海。神洞十虛。靜觀彼此形骸。內外狼籍。非一可取。舉如意云。會麼。若於此會得。三界上下法。同一本來心。其或不然。山僧有偈。洞然大火正燒時。此處留連實大癡。莫若早逃同快活。免教煎煮父娘皮。問曰。如何是大火正燒時。師曰。清早起來七個字。柴米油鹽醬醋茶。問曰。恁麼則身乃苦本。心乃累元。師曰。誰著你來。曰大解脫一句乞師舉揚。師曰。誰縛你來。

又舍利弗驕慢懈怠(至)亦勿為說。

諸佛大聖出見。單單為一件事。即人人本來具足圓滿覺性。即此妙經骨髓。聞此妙經悟此覺性者。以天地為自體。以萬物為自性。以萬物為自性。故物我一如。何得有自驕乎。以天地為自體。故聖凡平等。何有慢他人之不如乎。以聖凡平等物我一如。故我執自空。如紅爐片雪。何有五欲之深著乎。懈怠既絕。驕慢又無。何有妙經而不能解乎。到此田地。泥團土塊。放大光明。瓠子冬瓜。熾然常說。何有於此而不深領悟乎。舉如意云。會麼。若於此會得。步步釋迦出現。頭頭彌勒下生。變大地總是黃金。舉眾人齊成正覺。其或未然。須要掃去胸中蘊積。放下世上紛紜。單單念句阿彌陀佛。初則有念佛之人。後乃人亦即佛。正當此際。我相除而懈怠空。妙心圓而驕慢息。欲覺化為正覺。凡情轉作聖情。更何疑哉。咦。更說山偈。道理精明我相空。相逢自不覺疎慵。塵塵五欲塵塵妙。法界何嘗有異同。問曰。如何是塵塵五欲塵塵妙。師曰。不到東山久。薔薇幾度華。白雲消散去。明月落誰家。曰塵塵不妙時如何。師曰。蝸涎不滿殼。聊足以自濡。升高不知疲。竟作粘壁粘。曰妙與不妙俱拈一遍。如何是超出言象之表一句。師曰。心同虛空界。示等虛空法。證得虛空時。無是無非法。

若人不信毀謗(至)獲罪如是。

此一百三十句經。大略只是言謗經罪過。夫此經者。即人人本具妙心。既昧此心而不明。是名謗經而獲罪。蓋此心者萬形之模範。業者一心之影響。三世善惡唯心所造。如器出模。無不相類。如影隨形。在處莫逃。故云出乎爾者反乎爾者也。又云自作自受。舉如意云。會麼。若於此會得。言言開示妙法。處處宣揚妙經。存仁存義而有周召孔顏之稱。無瑕無疵而無桀紂秦隋之罵。光輝八荒。名垂千古。其或不然。謗斯經者若說其罪窮劫不

盡。嘆。聽說山偈。此心清白妙而圓。纔味絲毫被業牽。好把此經常對面。免教撞入死生圈。問曰。如何是謗斯經。師曰。念念違真性。時時昧自心。曰如何是讚此經。師曰。孝於家而忠於國。責在己而恕在人。曰恁麼則諸惡莫作眾善奉行。師曰。更聽山偈。諸佛眾生共此心。但隨善惡有升沉。肯能念念思修善。釵釧餅盆總是金。

#### 信解品第四

此一品經。因說譬喻。須菩提迦旃延迦葉目連四子領悟也。且道悟。悟個什麼。乃悟人人本具之妙性也。何為妙性。開口欲言即成兩個。通不開口却又遲疑。窮其始則不見其初。究其終則不見其後。廣而大之則不見其外。微而小之則不見其內。故華嚴諸佛大聖人之見。自凡夫時修行六度。漸積萬德。歷無數劫。乃至成道。闡化度脫眾生。入大涅槃。俱不離剎那際也。剎那際。即壯士屈伸臂頃。屈伸臂頃。有九百生滅分。剎那。乃百生滅分中半分也。以眾人被形器留礙。既被形器留礙。則所謂妙性亦隨之而不妙矣。以不妙。故有生死。有苦樂。有逆順。有善惡。今既領悟妙性。體如此之廣大。用如此之妙圓。道如此之神通。德如此之真實。則益知拘於形器之小。或昧於欲樂之疑。甘於業火之燒。久於情波之溺。展轉不覺。為可憐愍。嗚呼。吾佛大聖人。乃四生慈父。三界大師。不顧至聖之至貴。亦入生死海中拯濟我等。我等若不信解。是無智人也。是癡狂人也。舉如意云。會麼。若於此會得。古今不離於一念。乾坤豈有自他。變大地總是黃金。會萬物皆為一我。其或不然。更聽說偈。信來即聖不須疑。不信還應是自欺。好笑世間癡子輩。強將叔叔喚姨姨。問曰。如何是叔叔喚姨姨。師曰。法身常住而不認。却認生死夢中身。曰恁麼則頓悟佛性乃是丈夫。師曰。諸天亦稱頌。何人不讚揚。

#### 信解(再拈)。

止於至善之地而無毫髮之疑。所以謂之信。入於大光明藏而無毫髮之惑。所以謂之解。大哉信解之為義。苟非窮物理到知至田地。雖曰信。妄信也。不能信之篤也。苟非洞達天機到真誠田地。雖曰解。妄解也。不能解之深也。以不能深解故。凡言論文詞。徒尚華藻而無實。以不能篤信故。凡動靜云為。徒假威儀而無本。信解之義大矣哉。(相)學雖不廣。悟亦有宗。試再以信解詳拈一遍看。蓋自有上天下地以來。聖賢間出。闡演教化。莫不皆以仁義行其實德。正其名分。欲人人止至善之地而不疑。入大光明藏而無惑者也。然則今之聖賢不為不多。經歷歲月不為不久。而人尚有不解不信者何。性不明故也。夫性之本體。上而與

十方三世大聖人同其根。下而與四生六道眾含靈共其本。外而與山河草木即其身。內而與皮肉肝肺是其體。人人本具。物物完成。在聖不增。在凡不減者也。良以當人自昧。故各各藩籬。物物矛盾。所謂自棄自暴性之大體者也。舉如意云。會麼。若於此會得。一一天真。一一明妙。其或不然。再聽山偈。人人即佛不須疑。不信還應是自欺。一日肯能真克己。眾生何患不菩提。松牕既曉家家日。梅嶺來春處處時。此理洞然參得透。鳶飛魚躍大家知。問曰。如何是真克己處。師曰。山僧本愚拙。強做會談師。曰。恁麼則以責人之心責己。以恕己之心恕人。師曰。自古稱賢哲。無不皆如斯。曰。如何是直下成佛一句。師曰。以責人之心責己。恕己之心恕人。

### 我等今日(至)得無量寶。

此六句頌。乃迦葉旃延須菩提目連四子。自言我等本為變粗形為細質。易短壽作長年之小學。今日不意皆悟本來成佛。是未曾有之深意。譬如逃逝之子。既歷年久。不識父面。亦忘家地。一向從他乞覓。受大窮苦。忽入父城。本為活命。不期是父委付家業。得大富貴。故曰非先所望。而今自得。如彼窮子得無量寶。舉如意云。會麼。若於此會得。心同虛空界。示等虛空法。證得虛空時。無是無非法。其或不然。須向蒲團上冷坐十年二十年。乃至三十年。默默看個父母未生前本來面目。工夫純熟。忽然領悟。應當自知充塞宇宙。無不是妙淨明心。貫徹古今。無不是常住真性。到此田地。山華開似錦。大乘教典。歷歷宣揚。野水湛如藍。鼻祖玄機。明明掀露。更何疑哉。如再躊躇。聽說山偈。但從心外更馳求。正是騎牛更覓牛。萬水千山增悵望。三冬九夏討憂愁。既知幻化非真性。當信金烏即日頭。若個道人忘得久。江邊扶杖看浮漚。問曰。如何是騎牛去覓牛。師曰。將心求心。即性問性。曰。恁麼則本自圓成。匪從他得。師曰。一向同則失進修而墮寂。一向別則逐行住以乖真。曰。如何是中道一句。乞師指示。師曰。夢裏明明有六趣。覺後空空無大千。

法華大意卷中

廣陵寶城寺沙門 無相 說

吳興天池沙門 法聚 較正

長水平林居士葉祺胤 重較

### 妙法蓮華經第三藥草喻品第五

此一品經。大意言諸佛大聖人所談之道是一。眾人本具之性是一。但眾人所立之志不同。所領會之意不同。所進修之久近勤怠淺深迷悟亦皆不同。所以證果有小乘中乘大乘之不同也。非佛道有不同。人性有不同者也。故迦葉等四子信解之後。佛乃喻如一雨所霑。一地所產。而若草木各各榮茂。有萬不同。非雨施有不同。地有不同。乃草木各稟受不同者也。舉如意云。會麼。若於此會得。青青翠竹總是真如。鬱鬱黃華無非般若。牕前草是自家意思。園中竹即佛祖玄機。其或不然。須向靜室中與蒲團打合。將三十年工夫專專看個一歸何處。忽爾桶箍自爆。當大悟云。元來十方大聖人與自己共箇鼻孔舊矣。若更遲疑。聽說山偈。翠竹黃華真面目。春風元沒兩般心。既能直下知端的。葉底枝頭總妙音。問曰。如何是春風元沒兩般心。師曰。聽說山偈。大包無外細無內。此理人人不用猜。我許趙州談祖意。庭前栢樹是西來。曰恁麼則頭頭上顯物物上明不須疑也。師曰。更聽山偈。道體既然充宇宙。目前無法不真如。等閑拈起一莖草。即是蓮華七軸書。

#### 復講。

唯有如來如實見之。明了無礙。大聖人之心大而無外。以大而無外故。盡虛空界之國土風境人物。巨細升沉。無不見其邊際了然明白。大聖人之心細而無內。以細而無內故。盡心性之玄微。奧妙神聖。無不知其念慮洞然明徹。以盡知念慮故。上而諸佛之性覺。下而眾生之性欲。前而往古之劫名始初。後而來今之年號終窮。無有不知其精微者也。以盡見其形狀故。大而天地之圓偏廣狹。小而塵芥之起止聚散。無有不見其的實者也。故華嚴楞嚴方廣大集答諸弟子所問。或世界。或情欲。或半提。或究竟。了無罣礙。故曰如實見之明了無礙。非若拘於一日月所周旋之天地為究竟。止於一元會所該攝之年歲為極則。如以一元會所該攝之年歲為極則。須悟此一元會之先却是何時。以一日月所周旋之天地為究竟。須悟一日月外果是何境。如此自參。必當自識大聖人之



知見。豎窮橫遍。無不到於至處。舉如意云。會麼。若於此會得。撮塵雖與天地同體。而實小大迥殊。燈燭雖與日月同明。而實廣狹遼遠。其或不然。請聽山偈。上天下地中人物。億萬斯年幾佛生。唯佛人中為至聖。出言句句盡成經。問曰。如何是句句成經一句。師曰。信則龍女頓成佛。不信善星遭陷墜。曰恁麼則佛語真實當奉行而莫違。曰佛言真實便當學。不學為人成大錯。我見多少遠佛人。眼前事事強摸索。

### 授記品第六

授記者。乃大聖人付授記莛。保其人於千萬年劫之後。還如今日之言。無少更變也。蓋當人有真信真向。而夙習未忘。故至聖有真見真知。而保必成就。此為佛之能事。悟道之極功。非佛不能。非悟莫及。以世間庶聖預知。不過千年萬年尚不知其的實。以世間穎悟篤守者。不過一生兩生尚有味其根本。何得知人於百千萬億劫之後。更千百萬億劫。了了分明。不失今日之言。何得領人之命百千萬億生之後。更有千萬億生。一一洞徹。還得今日之記。大哉授記。非大聖人而不能。非真悟者而不獲。真悟者何。悟自己妙性大而無外細而無內前而無始後而無終。大聖者何。證自己妙性後而無終前而無始細而無內大而無外。以證其後也無終。其前也無始。故前後際斷。成一心也。以悟其細也無內。其大也無外。故小大情空。圓一性矣。以圓一性故。自絕生佛之假名。雖百千萬億之變遷。可類浮雲於天。於天何損益乎。以成一心故。自無自他之影迹。雖百千萬億劫之久遠。可比虛泡於海。於海何加減乎。故曰識得一。萬事畢。更何疑哉。舉如意云。會麼。若於此會得。會古今於一念。收刹海於毫端。却是人人固有。不難之事。其或不然。聽說山偈。一年三百零六句。日日皆是此心覺。若是此心果有遷。已隨三百六句錯。問曰。如何是已隨三百六句錯。師曰。食飯不知食飯者。著衣不識著衣人。曰恁麼則六根門首無人會。惹得胡僧特地來。師曰。伶俐闍黎。堪領佛記。

### 化城喻品第七

此一品經。申說諸佛開權顯實之大意。蓋法周譬喻。既悟一佛乘。如登寶所。恐下根生退。自謂機小而莫及。故引化城喻以曉之。化城。乃化作不實之城。以止息退墮機小之眾耳。既得止息。進力漸生。乃滅化城。復使其進。務到寶所。如佛知人不堪大法。權以變粗形為妙質。易短壽作長年。以漸教之。人心既純。復說大法。令悟本來是佛。此品又謂之因緣周者。謂佛為我等故。曾於往昔經無量劫。以此妙經教化我等。我等今日得聞妙經。若不信。是自昧夙時之正因。亦失見世之好緣者也。舉如意

云。會麼。若於此會得。如子見父母。如暗遇燈燭。大通智勝佛却是青州布衫。大聚寶所何別庭前栢樹。仰觀俯察至道縱橫。左顧右盼至神充塞。更說什麼前際後際這邊那邊。其或未然。須向靜室中放下更放下世緣。如紅爐點雪。提起再提起道心。若順水推舟。一旦工夫做熟。當自大悟云。寶所無寶所。成佛非成佛。三千界而物物全真。百萬劫而時時圓覺。到此田地。化城也如空含空。寶所也如鏡照鏡。更何疑哉。請聽山偈。一聲鼓響大家聞。却許何人識鼓神。識得鼓神周徧處。塵塵剎剎是全身。問曰。如何是鼓神周徧處。師曰。你還聞麼。曰學人不聞。師曰。你還記得話頭麼。曰學人記不得。師曰。塵塵剎剎是全身。曰請師直捷處道一句看。師曰。聽說山偈。若要直捷莫妄想。妄想恐墮世緣網。須知十方三世間。總是沙門一隻眼。

### 爾時大通智勝如來(至)十二行法輪。

此一段經意。大略只是言大通佛既受虔請應機說法。後乃各得悟解。各各成道果。更無他說。然講以悟解為宗。禪以入妙為本。(某)濫叨講肆。亦辱禪門。試以三轉十二法輪重拈一遍。末以禪家眼目略陳梗槩。夫三轉者。示相轉。勸修轉。作證轉。作證轉者。謂我已證。汝亦應證。勸修轉者。示善道路。宜應進學。示相轉者。示四諦法。便知向方。四諦法者。謂苦集滅道四聖諦也。謂之聖諦者。謂此四法皆是大聖人諦實之法也。何以謂之苦。地獄餓鬼畜生三惡趣是也。佛說此三處苦者。以此三處俱受逼迫。不得自在。故名苦諦。何以謂之集。殺盜淫兩舌惡口妄言綺語貪嗔癡十惡是也。佛說此十惡皆是召眾苦之本。故名集諦。何以謂之滅諦。冲虛妙粹清淨常樂是也。佛說此地眾苦不能侵。一靈常寂滅。故名滅諦。何以謂之道諦。三十七品修道名教是也。三十七品者。四念處。四正勤。五根。五力。七覺支。八正道。四如意也。如是三十七品。若講說。入海算沙。總是其體而已矣。如是三轉四諦。成十二行法輪。上根一轉即悟。中根二轉乃明。下根必須三轉。舉如意云。會麼。若於此會得。千山勢向嶽邊止。萬派聲歸海上消。佛法世法打成一片。道念情念融作一心。直得無法可說是名說法。其或不然。山僧有偈。但能不作三途業。三十七般法亦空。無事道人常打睡。任他日月自西東。問曰。如何是無事道人。師曰。不除妄想不求真。曰還了得生死也無。師曰。你喚恁麼作生死。曰恁麼則無明實性即佛性。幻化空身即法身。師曰。如是如是。

### 五百弟子受記品第八

此一品經。佛為下根不悟。說因緣一周明夙。世因緣之事。滿慈子等五百領悟。自述云。元來十方不隔。三世不遷。性本圓明。

心本靈妙。但當人拘於根塵之偏。囿於形器之小。舊習不消。所以有成佛不成佛之分。授記不授記之別。豈佛心有揀擇而授記諸子有上下乎。舉如意云。會麼。若於此會得。根塵迥脫。不異消片雪於紅爐。夙習頓空。宛若破輕漚於大海。一即一切。盡乾坤是個法身。一切即一。亘古今通為佛智。其或不然。須要靜中獨獨看個無始無終無內無外的竟是何物。工夫純熟。打成一片。必當自悟云。成佛不成佛。俱是辨空華之濃淡。授記不授記。俱是較兔角之短長。如到此地。繫珠之親。親亦我也。醉酒之我。我亦親也。更何貧苦之可拋。何富貴之可得哉。再聽說偈。一個圓明淨覺心。人人本具是他尋。必蒙授記方成佛。總是將金去換金。問曰。如何是授記方成佛之事。師曰。掀天功業世無對。不得封侯也是閒。曰。恁麼則理雖圓具。習要漸消。道總已成。還須佛印。師曰。聽說古偈。壯志稜稜鬢未秋。男兒不奮不封侯。翻思清白傳家客。洗耳溪邊不飲牛。曰。如是則不除妄想不求真。師曰。一道孤光。洞徹古今。

### 授學無學人記品第九

此一品經。授記之說。與前授記品說同。學者。明自本性而漸斷惡習。無學者。得悟自性而舊習滅盡。或曰。得悟本性。習惑滅盡。蒙佛授記。將來成大聖人。宜矣。只如纔欲明性理。纔欲斷惡習。亦蒙授記當來成大聖人。理恐非宜。智人答曰。人之本性。性即理也。元無聖凡之名可稱。元無善惡之迹可指。豎窮三際。橫遍十方。但以當人不知。或隨氣稟而有異。或拘習染而自差。所以有學無學二者之名。果能一念回光。復還天性。則無邊惡業直下頓消。無邊功德一時具足。更說什麼學與無學。故永嘉云。證實相。無人法。剎那滅却阿鼻業。若將妄語誑眾生。自招拔舌塵沙劫。舉如意云。會麼。若於此會得。頭頭總是。物物全彰。大而天地。眾而萬物。微而念慮。無不是祖師西來意。無不是七軸蓮華。無不是道人妙用。其或未委。須向靜中參句萬法歸一一歸何處。工夫久久當自覺悟。十世古今始終不離於當念。無邊剎海自他不隔於毫端。乃自家舊物耳。再聽說偈。夙習未消須要滅。習消學滅總虛言。人言有水皆涵月。我道無雲便是天。問曰。如何是無雲便是天。師曰。聽說山偈。圓明覺體本如然。昧者不知道有言。既肯迷雲都掃盡。緣何不是大青天。曰。恁麼則但離妄緣。即如如佛。師曰。闍黎如此。大家迴向。

### 法師品第十(講品名至三菩提兩段)

此一品經。推尊弘法之足以為天人師。聞法之人亦必成佛無疑。故曰法師品。(再舉)爾時世尊因藥王菩薩至三菩提。此一段經。廣記二乘八部四眾但聞妙經皆得成佛無疑者也。(再舉)佛告藥王



至三菩提記。此一章經。特記濁惡之時聞此妙經。乃至一句。一念隨喜。亦得受佛尊記。然此妙經。即人人自性之理。以人人自性元與十方大聖人無少間隔。以無少間隔。故聖人間出。闡揚至道。莫不皆指此性廣無涯際壽無終始萬善圓具萬理圓通本來是佛者也。以人不明此性。故於此性上起人我見。其見既萌則萬別千差之取舍憎愛。如奔蟻旋磨無有了期。以不悟此心。故於此性上生逆順情。其情既立。則萬種千般之喜怒哀樂似老象溺泥無有出日。良可嘆也。故吾佛大聖人。以四生同體之仁。以萬類同知之智。生大憐愍。演此妙經。直指人人本具妙性本與十方大聖人了無毫髮間隔。欲令人人一同悟入。復元來田地者也。如是。只恐不聞不信。但聞但信。將來成佛。如麵作餅。如白受采。豈難事哉。舉如意云。會麼。若於此會得。全身領荷。萬物一馬也。何真何假。天地一指也。孰是孰非。其或躊躇。山僧有偈。當人只恐信不篤。信得篤時心即佛。如施五彩白紙中。不須百樣功勞碌。問曰。經云若聞一句亦得當來作佛。未審學人還成佛否。師曰。你道那個不是佛。曰恁麼則人人本具。個個圓成。師曰。闍黎若是更躊躇。江北江南問王老。

若復有人(至)生此人間。

此一章經。科家謂之推尊其人。謂惟六種法師也。六種法師者。一受持經。謂領受妙道。永無退失者也。二對本讀經。謂尊道而行。不越毫髮者也。三離本唱誦。謂熟於斯道。左右逢源者也。四為人解說。謂已道既得。以道化人者也。五書寫流通。謂道德既明。萬人取法者也。六供養經卷。謂以道自重。備修眾善者也。然俱稱為法師者。此六種人。皆可為人中模範。海內舟航。堪當恭敬。或曰。佛特推尊之者何。蓋此妙經即人人本具之至理。以理不明故。經無量百千劫。於生死海頭出頭沒。無有盡日。今若得聞此經。則經理昭然而不昧。至道條然而不亂。以不亂故。折旋俯仰。皆合先聖威儀。以不昧故。念慮語言。皆是先佛玄妙。玄妙既與先佛相符。威儀又與先聖無異。烏得不以法師稱之。特推尊於眾人之上者哉。舉如意云。會麼。若於此會得。俯仰皆是妙經。鳶也宣揚。魚也宣揚。左右無非妙道。柴也書寫。水也書寫。其或不然。須向靜中看個喜怒哀樂的主人翁畢竟是何面孔。忽地悟來。便不受人瞞。元來如此。元來如此。如若再疑。山僧有偈。竹翠華黃總妙經。讀經真眼許誰明。今朝山野午拈拂。昔日瞿曇曉見星。向上有關時打透。現前無道不圓成。當人於此真能領。萬古天人師可稱。問曰。今朝山野午拈拂一句學人不會。師曰。今日將午。山僧講經。手拈拂子。有什麼不會。曰恁麼則運水搬柴。拈匙舉筋。無不是祖師的的大意也。師



曰。金屑雖貴。落眼成塵。曰如何是直捷一句。請師對眾宣揚。師曰。你肯念佛。無人掩住你口。

### 藥王若有人(至)其罪甚重。

藥王若有人問至必得作佛。此兩句經。言必得作佛之義。再舉何以故若善男子至種種供養者。此一篇經。言六種法師皆當以佛供養而供養之。以其成佛必矣。再舉藥王當知至廣演此經。此一行經。言如上六種法師皆再來菩薩也。再舉若是善男子至廣為人說。此一段經。極讚說經功德。再舉藥王若有惡人至其罪甚重。此數句經。極稱妙經毀之者其罪甚重。(某)才雖不敏。悟亦有宗。敢以毀佛毀經之罪輕重。拈一遍看。蓋諸佛居殊方之國。妙經即當人之妙心也。故毀經是毀自己之心。雖一言而難懺。罵佛乃罵殊方之佛。故惟年久而可消。甚矣欺心之去道。小則墮貪瞋痴之三惡。大乃積殺盜等之萬惡。或狹隘而崇尚偏真。或圓融而輕慢小善。或是一己之一而不知一之至一。或執一己之中而不知中之大中。皆所謂自欺自心而毀妙經者也。心既無始無終。罪亦無休無歇。豈不然乎。舉如意云。會麼。若於此會得。不可毀。不可讚。體若虛空勿厓岸。其或不然。須向靜中看得能看經者竟是何物。於此有悟。當自覺云。天地之塞吾其體。天地之帥吾其性。民吾同胞。妙蓮華。字字分明。物吾與也。蓮華妙。行行顯露。或再有疑。山僧有偈。自心即是妙蓮華。頃刻迷來有萬差。劍樹刀山高岌岌。鑊湯爐炭苦牙牙。披毛戴角輪迴久。冒暑衝寒歲月賒。切忌等閒開口謗。忙忙何日是歸家。問曰。如何是不毀妙經一句。師曰。諸惡莫作。眾善奉行。

### 藥王其有讀法華經(至)三菩提故。

此一段經。吾佛大聖人滿口極稱讀誦此妙經之人。且道佛語誠實。而滿口極稱。其必有意。(某)學雖不廣。見則頗真。試以此經深處略發揚看。夫妙經所詮之廣大。即當人自性之廣大。妙經所詮之義理。即當人自性之義理。妙經該始該終而貫徹古今。即當人自性該始該終而貫徹古今。妙經通真通俗而圓融物我。即當人自性通真通俗而圓融物我。良以當人不悟自性。於自性圓融之地生物我見。此見既生。六十二見。乃至萬差。輪迴不已。良以當人不悟自性。於自性貫徹之地立藩籬界。此界既立。萬八千界。乃至無量。區域何窮。嗚呼。不有大聖人演此妙經。直指妙性。使人人頓悟。則藩籬之重重。何日而徹。輪迴之鞞鞞。何日而休。今既聞此妙性有如是之廣大。有如是之義理。有如是之貫徹。有如是之圓融。則其聞經之人。成佛必矣。佛無二佛。烏得見性之人不為佛所荷擔。性唯一性。豈曰聞經之人不堪如佛恭敬。舉如意云。會麼。若於此會得。如室中之暗。縱百千年。燈

能頓破而皆明。如海上之波縱千萬尺。風能頓息而皆水。其或不然。山僧有偈。波即是水。燈即是火。伶俐高人。再莫問我。問曰。既是聞此妙經皆得成佛。且道今日說法。有幾人成佛。師曰。會麼。曰不會。師曰。闍黎早**已**成佛。只是不知。曰知則如何。師曰。無明實性即佛性。幻化空身即法身。

爾時世尊欲重宣此義(至)法華最第一。

此六十四句頌。大意只是尊尚此經。又是重拈前尊尚之意。所以佛於此經極口稱讚。欲人盡心敬奉者何。蓋人有一人之人。有萬人之人。有天下人之人。佛乃天下人之人。人莫能識也。道有一事之道。有一生之道。有始終究竟之道。此經乃終始究竟之妙道。人莫能悟也。此經為之究竟道者何。直指當人妙心。前前無始。後後無終。大大無外。細細無內。以無外無內故。宇宙洪纖之充塞。肺肝動靜之幾微。無非本然之妙。而當人自不悟也。以無始無終故。元會天地之聚散。頃刻念慮之變更。亦無非本然之妙。而當人自不明也。既悟且明。則往古來今。轉為自心之本寂。四維上下。轉為自性之真常。如是。則此經之功。非掀天勛業可比。蓋掀天勛業縱富貴綿遠。不過百年之間。得聞妙道。則直下轉凡成聖。息生死於無窮無際。豈掀天勛業之可比哉。信此經之德。非蓋世才能可並。蓋世才能。縱與奪自在。不過四海之內。得證妙性。則直下返本還元。明善復初。致中庸於不偏不倚。豈蓋世才能之可並哉。此所謂道之妙道也。吾佛為天下人之人者何。生即有目顧四方。手指兩間。週行七步之神氣。長乃具學通萬典。力超三界。量包千聖之天才。七日若不出家。七寶自至。而輪王之位必登。六年既得**已**辦。六通自在。而諸佛之心圓證。由是談經三百餘會。凡有耳目。莫不聞見。而盡心依學。住世八十一年。凡有血氣。莫不尊親。而盡**已**依從。度緣既畢。教化亦周。**斂**神復入光明藏。號曰涅槃。而厥本歸根流芳不**已**。化火自焚金剛軀。名曰舍利。人間天上建塔猶存。此所謂人之至人也。毀之者是不識至人者也。經亦有謗之者是不悟妙性者也。嗚呼。自天地開闢以來。演唱斯道者孔孟程朱。孔孟未見佛經。且置之而勿論。程朱親見佛經。尚曰夷狄之小法耳。至人豈容易識乎。妙道豈容易悟乎。識人悟道既為難事。宜乎極超誠明之地之至理。一而**已**矣。法華最第一之語。豈欺世誣民哉。舉如意云。會麼。若於此會得。佛法世法。打成一片。聖情凡情元沒兩般。融釵釧於大冶。頓滅釵釧之名。會溝瀆於大川。頓絕溝瀆之味。其或不然。山僧有偈。莫言你高。莫說我病。但看末後。安身立命。問曰。如何是安身立命一著。師曰。會。即龍女頓成佛。不

會善星遭陷墜。曰學人不會。師曰。見賢思齊。內疚不省。曰恁麼則當人要具眼。不可錯下脚。師曰。萬古乾坤。一朝明月。爾時佛復告藥王(至)當知是人得近阿耨多羅三藐三菩提。

爾時佛復告藥王至最為難信難解。此節經意。言妙法理深難解。(再舉)藥王此經至況滅度後。此節經意言非器勿傳。(再舉)藥王當知至手摩其頭。此一節經意。言持經之人功勝。持經即修道精誠。(再舉)藥王在在處處至如來全身。此節經意。言修道之處應敬如佛。(再舉)此塔應以一切至三菩提。此節經意。言非止修道之人可敬。修行道人所居之地亦可敬而生福。(再舉)藥王多有人至三菩提。此節經意。通前大意總是尊尚法華之意。(某)才疎學淺。行欠名輕。特於妙經頗得悟入。試為諸公詳解看。夫此妙經。非此柒卷二十八品。六萬餘言。而別有所謂妙經。蓋此妙經。在當人之心謂之性。在性之知覺謂之靈明。在靈明之取舍憎愛謂之情。在情之背向善惡謂之業。在業之前因今果。今因後果謂之數。在數之順受不逃謂之知命。在數之忍受欲逃謂之不知命。在命之貧賤富貴謂之天理。在天理之得失進退謂之因果。明因果則無惡不斷。無善不修。蓋善召樂。惡召苦。乃必然之天理也。明天理則不求不恃。不怨不奢。蓋求則枉勞。恃則徒望。怨則空背。奢則自費。而不知皆天命也。非人能不能。如是明業。則慎動心於人不知之地。戒行事於人不見之時。蓋出乎爾。返乎爾。形直影端。聲和響順。皆自業所感也。如是乃至若靈明。若情性。非理中真有如是之多事。惟當人於此經。明不明。持不持。信不信。之自千差萬別之變也。先哲云。識得一。萬事畢。其間此經之人乎。不能聞此經則不知道。不知道。則觸途成滯。惡作百端。展轉生疑。怨天怨地。每欲求樂。苦向他尋。不悟自家元是道本。所以大聖人於此法師一品廣讚弘經功德。舉如意云。會麼。若於此會得。處處綠楊堪繫馬。家家有路透長安。其或不然。聽說山偈。此經真妙善為本。不善皆非經上文。大路礙車須去礙。靈臺塵鎖必消塵。裴公綠野堂堪立。文潞香山會可親。今古人皆稱善事。請於善地各留神。問曰。如何是妙經悟處。乞師一指。師曰。天地同根。萬物一體。曰恁麼則莫生二見。即悟妙經。師曰。但無二見無人我。日日無非是誦持。

藥王譬如有人(至)說是法華經。

此一章經。謂之鑿井喻。大凡鑿井。向濕泥鍬之。知水必近。乾土鑿之。知水必遠。喻修行人得聞此經。悟明至道。成佛近矣。不聞此經。不悟大道。成佛恐難。(再舉)藥王若有善男子至說是法華經。此一章經。言時為法師為人講說。須具三事。三事者。人如來室。著如來衣。坐如來座。是也。蓋座者。悟一切法空



是。若不悟一切法空。則被一切法之所礙。既有諸法罣礙。死生去就。取舍運為。皆煩惱也。自既煩惱牽纏。何得謂之法主。衣者。真得善人君子柔和忍辱心者是。若無柔和忍辱。在處與人相拒。奮怒百端。既奮怒百端。與常人何異。既與常人不異。何以謂之法師。室者。大慈大悲者是。若不慈則不能與人樂。若不悲。則不能與人拔苦。既不能為拔苦。是無義之人。既不能使人安樂。是不仁之人。既不仁不義。我何以為人談經。三者同具。是真說法。三者缺一。是讚經之人。三者缺二。聞經之人。三者俱缺。是常人也。舉如意云。會麼。若於此會得。不須釋迦授記而成佛無疑。即是彌勒下世而度人可信。其或不然。聽說山偈。莫道法師尊貴好。法師也要具三般。不然大眾俱褒貶。辨似懸河亦自瞞。問曰。如何是亦自瞞。師曰。披蓑救火。掩耳偷鈴。曰。恁麼則自成可以成人。自覺可以覺人。師曰。源潔流清。形端表正。

### 藥王我於餘國(至)偈終。

藥王我於餘國至令得具足。此一章經。言說經效驗。說經即道德圓具。而人天欽崇。庶類從化。理之自然也。(再舉)爾時世尊欲重宣此義而說偈言至得見恒沙佛。此偈重宣法師品一遍之義。蓋妙經圓示一大之至道。法師圓證一大之至人。非至人無以證一大之至理。而闡揚一大之言。非至道無以收一大之至教。而明貫一大之心。一即大。若有二有三有千萬。即不大之理也。大即一。若有彼有此有分別。即不一之理也。既一而大。大而一。同太極而圓常。合大道而冲妙。從此發於言。言妙經也。從此行於事。事妙德也。用此以致君。君堯舜之君也。用此以澤民。民堯舜之民也。如是乃至充塞宇宙。貫徹古今。一一而大大。何莫而非吾心全體大道之妙乎。故記曰喜怒哀樂之未發謂之中。發而皆中節謂之和。中和即一大之理。蓋一則自無喜怒哀樂。大則無不中節。天地位而萬物育。誰曰不然。老子曰。天得一以清。地得一以寧。侯王得一以天下和平。鬼神得一以靈。蓋天之道。日月有度數。星辰有躔候。風雨有時若。寒暑有節常。無一主之則四者皆亂。而天不清。地不寧。天下不和平矣。如是則一之道乃清寧和平之至道也。舉如意云。會麼。若於此會得。頭頭顯露。法法全真。其或不然。再聽山偈。一大中和會得來。爹爹元沒兩般腮。從儒從道并從釋。關鎖重重自打開。問曰。如何是一大中和會得來之理。師曰。等閒識得東風面。萬紫千紅總是春。曰。恁麼則皇天無二道。聖人無兩心。師曰。再聽山偈。此心不必別安排。萬古乾坤一聖胎。除是不求求不得。得時還是一中來。

見寶塔品第十一



此一品經。三周法備。四眾記圓。法身之談既全。本願之心亦足。故感過去之多寶佛。馳願塔以聽聞。遂致現在釋迦尊。集分身而開塔。三展淨土。會古今於一念。斯時也廓此心元舊之封疆。收剎海於毫端。斯處也實此性本來之面目。舉如意云。會麼。若於此會得。舉首低頭。多寶佛不須開塔。揚眉瞬目。釋迦佛豈用會身。鳶飛魚躍。妙經宣揚。兩施雲行。諸佛出現。其或不然。須向靜中萬緣放下。一念專提。看個父母未生前本來面目。如是工夫久久。必當自悟。本無過去。何有未來。十方諸佛國即是吾心。一切諸眾生即是自己。我人之見既忘。是非之心自息。到此田地。可謂道千江有水千江月。萬里無雲萬里天。更若躊躇。聽說山偈。法身周遍莫他求。求則分明錯念頭。記得古人曾有語。騎牛不必更尋牛。問曰。經云會集十方諸佛意旨如何。師曰。但莫妄想。曰分身諸佛畢集寶塔乃開意旨如何。師曰。妄窮真現。曰三展淨土廣大莊嚴以容來佛意旨如何。師曰。心中莫存世念。曰恁麼則探珠宜靜裡。動水取應難。師曰。十方三世佛。俱以靜為先。曰只如靜久畢竟如何。師曰。動靜成一。乃為妙處。曰此經闡明一大。如何是一大之妙。師曰。但莫憎愛。洞然明白。

若以大地置足甲上(至)偈末。

如此偈有一百九十餘句。大略只是廣讚妙經難逢難遇。當生敬仰。當盡心奉持。當熟思而有覺悟也。或不如此。虛生浪死人也。何以知之。蓋此生不聞此妙經。則道無由發明。道既不明。自性不明。性既不明。心之所思。言之所發。日所行事。皆不明矣。此生不明。來生復來生。後世復後世。以至無量恒河沙數生世。料知皆不明矣。何以故。今日之心。萬萬世後之種子也。

(某)才荒學淺。見狹悟微。然於此經略有入處。試特以適所舉句復講一遍看。夫此經所談一大之道。即記所指中庸之理。亦道所言一大之妙也。經之一大。偈已具言。記之中庸。眾亦共曉。老子一妙。誰不同知。但於行事之際鮮得中庸。存心之時少見一大。至於取舍去就之頃。行藏念慮之間。非止不一。亦乃千萬。宜乎此經暫讀為難。讀即聞道也。非對紙墨之本為讀也。舉如意云。會麼。若於此會得。野色更無山隔斷。月光常與水相連。其或不然。更聽山偈。妙經一大許誰知。知則中庸可共時。世上事難難却易。此經不遇後難期。問曰。如何是一大之旨。師曰。諸佛法身。當人妙性。曰。恁麼今日說了。為什麼又道難聞。師曰。你雖聞此說。如不聞一般。曰學人字字明白。為什麼與不聞一般。師曰。便也聞。却信不及。曰信得及時如何。師曰。龍女頓成佛。只在獻受間。

## 提婆達多品第十二

此一品經謂之得聞經之機。修道之要。乃成佛甚速者也。蓋天下之眾惡。人不能作者。達多能作也。天下之眾善。人不能為者。吾佛能為也。以吾佛能為眾善。故謂之大慈仁。謂之大聖人。具足妙相。天神擁護。飛走欽服。宜其然矣。以達多能為眾惡。故謂之極頑愚。謂之大罪人。具足醜相。天神誅戮。鳥獸銜冤。亦宜其然矣。此法華會上佛亦授記達多作佛者。顯示惡業迹也。佛性本也。本既存而迹可消。罪可滅。而佛可證。故引龍女頓成佛之事以實之。又此經世傳有四句口談正在此品。謂彩雲影裡仙人現。手把紅羅扇遮面。急須著眼看仙人。莫看仙人手中扇。其旨曰。世間逆順百端。皆五彩雲。雲中皆有說此妙經之仙人。以妙經。仙人傳來也。又逆順百端難忍難祛之際。謂之仙人手中紅羅扇。當此之際。會得個大而無外。細而無內。前而無始。後而無終。如海受萬派之聲。嶽止千山之勢。便是仙人說妙法華經。不見手中扇也。大凡修學佛者。果能二六時中刻刻子見。無前際後際。這邊那邊。既無我人眾壽。自無取舍愛憎。到此田地。境即心也。心即境也。我一佛也。佛一我也。龍女成佛。猶是有獻受之遲。當體即真。豈非無記證之別。其或未委。更聽山偈。虛空體本絕雲霞。縱有雲霞見自差。會得虛空本無物。仙人終日說蓮華。問曰。如何是直下頓成佛一句。願師直指。師曰。若要直指。起來禮拜。曰學人每日禮拜。何待起來。名為直指。師曰。只是不肯起來。便是不肯聽此妙經。曰恁麼則隨順是師學。得見恒沙佛。師曰。闍黎肯如是。處處見仙人。

## 持品第十三

持者。止於至善之地。不遷不易之正定也。蓋人生於兩間萬類之中。必有知覺之心。既有知覺之心。必有好樂恐懼等念。念之發處。必因逆順憎愛之境。逆順憎愛之念不已。必有天堂地獄。絲竹刑杖苦樂之具。此具既有。則最初之元心。心中本具之至理妙道。隨之而變為萬別千差矣。不有大聖人具以知見開示此心。則人人終不能自悟本性妙體。無大無小無始無終之妙也。妙經既開示。當人能悟入。則此心也。充塞宇宙者。皆謂之妙心。皆妙心故。鳶飛魚躍而不疑。日升月落而自一。則此性也。貫徹古今者總謂之妙性。總妙性故。死生聚散而不惑。去來動靜而自如。到此田地。晴夜無風。湖心月影。季春雨過。幽谷華香。亦不足以喻持妙之萬一也。此處持之。不遷不貳。惟一惟中。可以與諸佛鼻孔一般。可以與千聖肺肝一樣。於此不能持。守被塵境移。可謂道春秋成敗知多少。萬載千年卒未休。其或更疑。聽說山偈。持此經時萬慮沉。逢違逆順莫呻吟。工夫做到至誠地。三世十方

即一心。問曰。經中謂持此經。師謂持此心。意旨如何。師曰。經是照心之燈燭。心是持經之堪與。曰恁麼則心即經。經即心。莫生二見。事即理。理即事。本是一根。師曰。更聽說偈。了無毫髮念頭來。純一功深心自開。七軸蓮華如此守。十方諸佛嘆奇哉。

#### 安樂行品第十四

心無他適而自若謂之安。性得其所而圓順謂之樂。久不變動而功高謂之行。如是之行也謂之妙行。如是之樂也謂之妙樂。如是之安也謂之妙安。蓋有大道為之主宰者。凡百欺心之順事。違理之順得。逆天之順享。皆不愛也。有妙經為之印證者。凡百本性之眾善。克己之多勞。諸佛之妙德。皆勤修也。以能勤修。如上聖德賢行。始可謂之聞經善人。以能圓契。如前大道妙經。始可謂之修行之善業。修行既善。凡百毀謗輕慢之言自無。灾障汙穢之事自絕。從此光明廣大。道德尊崇。現世為天人師。他日登佛聖地。誰曰無是理哉。舉如意云。會麼。若於此會得。心如皎月。體似虛空。十方無不仰其高。萬姓無不稱其妙。如或不然。須向靜中切切舉個阿彌陀佛。復自驗云念佛者何心。不念佛時何物。工夫打成一片。當自悟云。佛外無心。心外無佛。到此田地。可謂道上天下地彌陀佛。魚躍鳶飛白藕華。更有何人還不悟。痴痴門外問三車。問曰。如何是門外三車。師曰。羊車鹿車大牛之車。曰羊鹿車時如何。大牛車時如何。師曰。葵華向日。柳絮隨風。曰恁麼則信向大乘。莫隨小見。師曰。更聽山偈。要能安樂行無虧。念念心休向外馳。日久功深成一片。大千世界碧琉璃。

#### 從地湧出品第十五

此一品經。因六萬恒沙菩薩各有六萬恒沙眷屬。一一菩薩眷屬各曾無量劫修習。具黃金相。具清淨梵音。具廣大辯才。具至聖道德。忽從地湧出。敬禮吾師。稱云是我等師。我等慈父。開示我等。得成妙道。時眾皆疑云。吾佛出家未久。成道亦後。何以從地湧出六萬恒沙大菩薩各各領六萬恒沙菩薩眷屬。各來禮敬。稱師稱慈父。譬如百歲老叟稱二十五歲少壯為父。父亦喚百歲老叟為子。是可疑也。蓋此疑者。不知吾佛根本。遠自無量不可量之前。悟此妙道。證淨妙身。常居實際之地。常起我人眾壽之四相。起惑作業。妄自升沉。乃示同生滅。演教度人。欲人人還復本源。同歸實際。此吾佛之本意也。如是會得六萬恒沙之廣眾信向。豈為遇哉。乃至盡法界悉同證妙身。同成正覺。亦不為多。於吾佛久近。亦不須疑也。咦。聽說山偈。法身無去亦無來。可嘆時人空自猜。三際十方俱坐斷。乾坤信是眼中埃。問曰。如何

是三際十方俱坐斷。師曰。會麼。曰學人不會。曰乾坤信是眼中埃。

### 如來壽量品第十六

醫師喻。羅絡始終謂之佛壽。包括空有謂之佛量。得佛之量者。一日月周旋之界。空中一塵。盡空塵之天地。海中一漚。極海漚之廣潤。乃性天之微塵耳。悟佛壽者。一元會該攝之時。劫中一刻。盡劫刻之運世。年中一息。極年息之久長。乃理曆之瞬息耳。蓋斯道之體。其前無始。其後無終。大而無外。細而無內者也。以眾人不知。我我間隔。物物偏私。所謂無始無終之圓物。遂離之為元會運世時矣。所謂無內無外之大體。遂裂之為東西南北之方矣。既有方向。外而曰蠻曰夷。內而曰華曰夏。烏得不張王李趙。爾汝比隣乎。既有壽年。近而曰元曰宋。遠而曰羲曰皇。安得不年月日時。往古來今乎。嗚呼。吾佛大聖人宣揚此壽量品。良有以也。將長人之短促而至究竟乎。將廣人之狹小而至太極乎。將欲人人徹悟而叮嚀教誡乎。不然。何以醫師之喻而再四勉旃乎。舉如意云。會麼。若於此會得。不隨往而往者此靈心也。不隨來而來者此靈心也。不隨物而物者此靈心也。其或不然。更聽山偈。自從撞入個胞胎。添却元翁多少獸。若是元翁能大悟。此身天地一微埃。問曰。如何是佛之壽量。師曰。世上算師數不得。曰餘世人與佛本來人還有壽量也無。師曰。你曾見本來人也未。曰恁麼則元翁無面目。世人徒自猜。師曰。闍黎。

### 分別功德品第十七

此經乃宣揚此心之廣大久遠。不滅不生之妙典也。此心既明。則功德無有涯際。豈容有所分別乎。所以有分別者。非此心之理有分別。乃眾人領受之不同。所以功德有淺深多寡也。經中以布施持戒忍辱精進禪定五波羅蜜。精一修行。經八十萬億多劫所修功德。不如一念信受此經功德。以聞此經。必悟圓滿覺性。以悟圓滿覺性故。必能會無始無終於寂然不動之中。必能會無為無變於感而遂通之際。如是則豈有為有變有年有劫之功德可比擬哉。故曰佛子住此地。即是佛受用。舉如意云。會麼。若於此會得。生死永斷。苦樂無端。盡法界總是真常。括古今通為妙性。演之為易。可以趨吉避凶。頌之為詩。可以移風易俗。如是乃至世諦資生。無不化為真如妙理中庸聖行者也。嗚呼。聽說山偈。此經一句信無疑。便是圓融法界時。萬種有為皆費力。吾心頓悟即菩提。問曰。如何是頓悟即菩提之理。師曰。若能頓悟此心。則無聖無凡。非空非有。曰恁麼則本無聖凡。人自迷悟。師曰。杲日卓午雲消盡。具眼何人不見明。

### 隨喜功德品第十八



此一品經。極讚聞此妙經功德。無有涯際。不可稱量。故以展教第五十人隨喜功德以讚之耳。蓋以資生之具。盡心供養他人以至於老。乃百年之夢事。亦剝他人來世富貴之利劍耳。於自性何益哉。第五十人隨喜此經之功德。雖今生不明斯道。乃已種當來成佛之種子。既有成佛種子。同緣會遇。必得親聞妙經。既得親聞妙經。成佛必矣。既得成佛。逆推今日隨喜之為種。豈資生之幻具。助緣之夢為。可比成佛之大功。了生死。證涅槃之大事乎。舉如意云。會麼。若於此會得。無邊幻妄頓滅無餘。無窮死生頓消無迹。盡大地作沙門一隻眼。了無毫髮之疑。盡十方是箇自身。亦何嘗擬議。其或不然。須向靜中自看父母未生已前。今日之思量計較者畢竟在何處安立。看來看去。必然有悟云。我本不生。人何曾滅。眾生諸佛悉是假名。五教三乘皆為虛說。到此田地。可謂道一條大道本無迂。自是當人見識遲。今日肯能真領悟。目前何法不如如。問曰。如何是如如。師曰。綿州附子漢州薑。曰恁麼萬別千差。如如之理何在。師曰。會得時本無千差萬別。曰如是則見自異而自差。體本同而本一。師曰。不可隨語生解。曰畢竟一歸何處。師曰。山僧不知當人自看活套。曰隨喜妙經既有無量功德。且道今日信某禳災一句作麼生道。師曰。似日消清霜。如火焚枯草。

### 法師功德品第十九

此一品經。演出得此經之靈驗。蓋妙經所詮者性道也。悟此性道者。形雖凡夫。心即佛也。心既佛之妙心。乃一心上帝則主宰乾坤。化生萬物者也。心既如佛。則一身隨之而妙。身既隨之而妙。則六根能具廣大神妙。六根既妙。則六塵悉能隨神指呼。能一能萬。能短能長。乃至手取天地外之物。如手拈香。眼視往古來今之事。如眼觀掌。亦真圓證本心之常事者也。何法師功德廣大之可疑哉。舉如意云。會麼。若於此會得。佛一我也。我一佛也。彌陀與我不是兩般。我與達多元非二質。融萬象成一法身。會古今即一知見。其或不然。須向蒲團上靜坐二三十年。單單看個大而無外。果有外乎。果無外乎。前而無始。果有始乎。果無始乎。始處得其實。終處亦真。外處得其真。內處亦實。悟到此田地謂之知至。究到此田地謂之物格。眾如有疑。聽說山偈。此心神妙人人佛。自是人人不自知。肯信山僧輕一點。六般神妙任施為。問曰。適云六般神妙任施為。師亦法師。六般神妙還具足也無。師曰。我又不是法師。問什麼具足不具足。曰適來高座敷演。大眾蒙益。為什麼不是法師。師曰。若喚作法師。不值半文錢。曰不喚作法師意旨如何。曰糟粕人間真打透。庖羲畫畫是秦灰。

## 常不輕品第二十

此一品經。演唱能行此妙經之妙行。必將成佛者也。蓋嘗靜思之。人生於天地間。醉生夢死者固不在此論。但有少覺悟者。試為詳裁之。夫妙經乃演人人本具之性理也。圓滿覺性固無欠而無餘。蘊積妄情實有生而有滅。妄情既有。生起消滅之道豈無。故吾佛大聖人引起往昔為凡夫時初得覺悟修行。以為今悟妙性修行模範也。妙行有三。曰平等行。曰無相行。曰無我行。無我則心量廣大。見識淵泉。菩提涅槃而日日增榮。解脫智慧而時時深入。故曰無我而大。大而化之謂之聖。聖而不測謂之神。無明逆順之境忘於外。善惡之機息於內。無好樂憂患之念萌。絕利欲爭奪之念舉。故曰守其無相。相固常有。體其無體。體固全真。平等則雖冤親而不同。實冤親而共性。雖男女而有別。實男女而同根。廓七尺軀為大千沙界。廣一寸心作太極圓圖。故曰心同虛空界。示等虛空法。證得虛空時。無是無非法。如是則萬事紛紜而常一。萬法變化而常真。收萬古於一念慮中。會塵刹於一毫頭上。到此田地。誰曰成佛更有遲疑。果若更疑。聽說山偈。此心平等忘人我。雖未修行佛已成。若道山僧言不當。不輕菩薩可憐生。問曰。不輕菩薩授記一切人是佛。且道蒙授記者還有不成佛者麼。師曰。只你不成。曰學人為什麼不成。師曰。你若肯成。不將再問。曰恁麼則直下承當。更休擬議。師曰。善哉大丈夫。

## 如來神力品第二十一

此一品。顯示佛佛具如是神通妙用也。然以世眼觀之。則黃帝乘龍。欒巴嚙酒。龐婆入石。長房縮地。皆罕見之難事。誠以道眼觀之。則維摩丈室容百萬之多座。釋尊一時歷百千之長年。一舌抵初禪萬萬里之高。一聲遍十方萬萬界之廣。亦大聖人之末事。何以如此。以吾性無方所年劫者也。此性既無方所年劫。則歷不可數之元會。自心何嘗少間。如是則於一念頃經無量恒河沙之大劫。乃至一語一默光照十方。一抑一揚聲宏萬世。皆佛之小事。性之影子耳。舉如意云。會麼。若於此會得。一即一切。一切即一。往古即今。今亦往古。其或不然。必當久靜一二十年。看個已往年歲為什麼此心不隨已往而不存。未來年歲為什麼此心不隨未來而不覺。現在萬物紛紜為什麼此心不隨萬物而獨知。如是反復參究。久久純熟。當自悟云。冲虛妙粹。炳煥靈明。卓然而獨存者也。到此田地。百萬神通妙用。皆運水搬柴之易。又何難之有哉。咦。再聽說偈。運水搬柴一妙神。自家不悟可憐人。今朝頓悟從今後。土塊泥團即法身。問曰。如何是泥團即法身。師曰。天地之塞皆吾體。天地之帥皆吾性。曰如何是要妙一句。師曰。一片寒光。吐吞萬象。

## 囑累品第二十二

囑累者。以言托之曰囑。以法系之曰累。欲使傳續妙法。利達無窮。故曰囑累。蓋此妙經。三周已畢。大道斯圓。若不付托得。演說一場無益。(某)才荒學淺。固非付托之人。因正緣真。敢任流通之責。試再為詳拈一遍看。夫法者何法也。即吾佛大聖人經無量久遠年劫修習之正法也。此正法之意者何意也。即人人本具之性理也。何謂性理。即吾心豎窮三際。橫遍十方。萬善萬能之實理也。此之實理。雖人物共稟。但不能自主。而隨形器根塵之所幻惑者。靡靡皆是也。故吾佛大聖人最先覺悟。愍眾人之不悟。乃示同生滅。演此妙經。直指當人之性如是而已矣。性理既明。留言可法。故特運大神力。以一手摩萬億多眾之頂。自稱此經難得。具諸佛大道德大神通之秘藏也。宜各受持流布。如法修習。如我無異。是至囑也。舉如意云。會麼。若於此會得。著衣吃飴。二聖寶塔儼然。舉手擡頭。七卷蓮經在爾。其或未委。山僧有偈。一乘義理自家性。七軸蓮華紙上心。我愛普賢曾有說。教人莫向外邊尋。問曰。如何是囑累末後一句。師曰。切忌生疑。曰學人尚不曾信。疑從何生。師曰。信也好。疑也好。曰疑也好時如何。師曰。四生六道劫時長。換面改頭增懊惱。曰信也好時如何。師曰。三賢十聖性天廓。八解六通心地寬。

## 藥王菩薩本事品第二十三

此一品經。示藥王燒身煉臂供養此經之迹。以顯此經尊崇玄妙不可得見之難。蓋燒身空我相也。煉臂忘我執也。我執既忘始可與之論一大之至理。我相通絕始可與之言一大之真常。舉如意云。會麼。若於此會得。毗盧妙體。與一片白雲橫谷口而無殊。大藏靈文。共幾多歸鳥盡迷巢而不別。其或不然。須盡掃蕩胷中舊習。單單念句阿彌陀佛。初舉之時。雜念紛飛。凡情交錯。久則純熟。一心圓寂。萬境如如。到此田地。必當自悟十世古今始終不離於當念。無邊剎海自他不隔於毫端。燒身也煉臂也如雲去雲來天本淨。此方也他界也若華開華落樹何關。更何疑哉。再聽山偈。只怕此身煉不盡。此身燒盡我無依。是名苦行流通旨。珍重當人善護持。問曰。是名苦行流通旨其意如何。師曰。行不苦則志不堅。意不誠則念不切。曰恁麼則克苦乃入道之初門。無我為成佛之捷徑。師曰。再聽山偈。放逸名為不立身。豈能成佛號圓人。既然要做丈夫漢。須掃從前懈怠塵。曰力進一句再請師道。師曰。若不力行成不得。百年容易暗消磨。不如當下便行去。萬古令人出愛河。

## 妙音菩薩品第二十四



妙音者宣揚此經之具也。故吾佛大聖人示此以表揚妙行流通也。夫妙經之旨。在人人分上謂之覺體。在佛佛道上謂之三藐。此謂正等。在人事取舍進退之宜謂之道。在覺體廣大圓融謂之佛。在吾佛隨機應化宣示謂之經。在慮空念寂之地謂之定。在無人無我之時謂之空。在解怒絕慾之頃謂之力。如是乃至動靜紛紜。彼此一萬。有無量百千萬億名。善者皆此經之妙旨。惡則皆凡下之愚情也。故妙音能種種示現。輔贊此經。以表妙行流通也。舉如意云。會麼。若於此會得。任短任長休剪綴。隨高隨下自平治。其或不然。莫道死來真作一。安身立命恐多般。世間多少英靈漢。多少臨終被熱瞞。於此心果未安。還須念句彌陀佛。心心即佛。佛佛惟心。忽地打成一片。當自大悟云。本無生死及升沉。廣大冲虛妙甚深。從今不受人瞞却。萬古乾坤號妙音。問曰。如何是妙音之旨。師曰。一而萬。萬而一。體露堂堂。曰恁麼則無一物不是毗盧之體。無一名不是吾道之名者也。師曰。再聽山偈。乾坤萬別與千差。識得元來只一家。於此既能真會得。何人脚下不蓮華。

### 觀世音菩薩普門品第二十五

普門者。示以觀音妙智觀力。契機圓行。而進於妙音。無緣慈濟。響答大千。而普應無盡也。蓋人人所具妙性。圓滿十方。洞無隔礙。特以眾生業惑。幻妄迷真。見聞覺知。遂相吳越。而失本元明。塵消覺淨。顯復圓通者。惟聞機最勝。故楞嚴云。一根既返元。六根成解脫。六解一亡。元明不二。心非其心。無一心而非其法。法非其法。無一法而非其心。一多緣起而恒真。千差涉入而無礙。非普門而何。舉如意云。會麼。若於此會得。觀音菩薩常在諸人面門出入。示現神通力。說無等等法。汝若不會。須以妙奢摩他三昧觀力回光自看。看到着眼不及處。驀忽拶透。便知百千手眼。不離自己。苟或不然。試聽山偈。一鏡堂堂萬像俱。大千何處不光暉。迥然不生根塵界。手眼通身却是誰。問曰。如何不生根塵一句。師曰。根塵裡薦取。曰猶是學人疑處。師曰。耳裡青黃眼裡聲。曰恁麼則悟來月滿三期內。迷去雲開六不收。師曰。你喚什麼作月。曰如何是觀音妙智力。能救世間苦。師曰。蒼波海底珊瑚月。紅焰爐中菡萏風。曰是則眾苦所不到。師曰。功德不少。

### 陀羅尼品第二十六

此一品經。以陀羅尼標名者。以此妙經理行智果。四大法圓。若不總收。道無究竟。故以此名品也。梵云陀羅尼。此云總持。即總持萬法。圓收萬善之密也。(某)初學此經。以為誦得乃了。既誦得了。又以解其義理為難。既頗曉解。又以行不得為難。既依



而行之。不過日用之中。人事之小善耳。來世為人之志。來世如今之解。皆不得決然由我行藏而無少疑也。由是反覆參究。忽地如獲舊物相似。從此徹頭徹尾。了無毫髮進退之疑。從此若彼若此。俱有佛祖取舍之斷。故敢以妙經。為人發明也。夫圓收萬善。總持萬法。果是何道。即人人本具之妙心也。人人既具。何以輪轉六道。汨沒四生。到今不了。復如之何。以人人本具。不遇良友指教。又無自察之才。則終身不明。今既不明。則知萬萬世後萬萬世徒生死。終無了悟之緣。所謂本具妙性徒本具者也。嗚呼。我等夙培善種。幸獲正教。宜當革故鼎新。必究必行必成必了。豈不快然於自心乎。豈不為如來使。往來三界乎。豈不與十方諸佛歷代祖師把手共行乎。豈不謂之圓收萬善總持萬法乎。舉如意云。會麼。若於此會得。可謂道打開華藏重重海。獨露堂堂大覺場。其或不然。須是人祕密關。立總持志。拚三十年工夫。單單念句六字真言。坐與真言共坐。臥與真言共臥。乃至言語作息俱與真言無二。如是則必有融成一片之時。必有三世十方正等之日。必有凡聖悟迷本只一心之見。到此田地。可謂道太湖三萬六千頃。月在波心說向誰。更有人來伸一問。山僧合掌念多醯。問曰。如何是多醯二字。師曰。此是藍婆呪。不須義上疑。曰呪即不聞。究竟總持一句作麼生道。師曰。多醯多醯兜醯醯醯。

### 妙莊嚴王本事品第二十七

此妙莊嚴王本事品者。舉古例今。欲使行人以道自衛。消息邪緣。不墮垢染而竟果德。亦以見利行同事。轉邪歸正者。良由受持此妙經力。而不失方便之權也。然則不染而染者。妙莊嚴也。染而不染者淨德也。蘊真如之妙理者淨藏也。破痴暗於智照者淨眼也。故能轉昔日之妙嚴為今日之華德也。且道如何是此妙經力。舉如意云還會麼。若於此會得。五蘊浮雲空去來。三毒水泡虛出沒。如或不然。聽說山偈。邪因正顯正因邪。邪正元來共一家。邪既不生誰是正。寶光匣冷吼青蛇。問曰。昔何謂之莊嚴。師曰。說莊嚴者即非莊嚴。曰今何謂之華德。師曰。即非莊嚴是名莊嚴。曰方便之力其事云何。師曰。劍為不平離寶匣。藥因救病出金餅。曰畢竟如何得法眼淨去。師曰。功德天。黑暗女。有智主人。二俱不受。

### 普賢菩薩勸發品第二十八

此品名普賢勸發者。法會既終。進修功畢。智圓覺滿。證佛所證。法化流通。無復自利。直以善入世間三昧無作願力。現無量色身。自在宏化。轉入妙覺向上之道為果後常行也。自是而往。橫身十界。高踏毗盧。泯三世而無際。亦無無際。洞十虛而無方

亦無無方。生死涅槃誰忻誰厭。佛窟魔宮無取無舍。如是相。如是性。如是體。如是力。猶涉化機。大無外。小無內。前無始。後無終。未超見量。舉如意云。會麼。於此會得。露柱燈籠頭頭實相。墻壁瓦礫一一光暉。麻三斤栢樹子塞斷玄關。乾屎橛死猫頭掀翻妙寨。如未究竟。再聽末後一偈。鶴出銀籠橫碧海。鳳離金網拂雲衢。祇應不戀長安樂。到處逢人是故知。問曰。如何是到處逢人是故知。師曰。煩惱海中為雨露。無明山上作雲雷。曰此莫便是普賢常行否。師曰。是即是。莫差誤。曰如何得不差誤去。師曰。客來須待。賊來須打。曰如是則覓火和烟得。擔泉帶月歸。師曰。不防靈利。曰恁麼則七軸玄文。宜為剩法。師曰。瘡病不假驢駝藥。曰還有不病者麼。師曰。你且道誰是病者。曰是則安用勸發。師曰。為汝不薦不病者。曰向上事又作麼生。師曰。早成向下去也。曰學人不會。乞師方便。曰任從滄海變。終不為君通。

### ○附天池沙門法聚頌

宗教明明沒兩途。漫從取舍強分疎。衣珠未示珍何失。寶所親登路早迂。鶻噪雅鳴圓極唱。山明水碧露真模。拈華昔日今如意。一種金蓮火裡敷。

### ○附陳白沙寄太虛上人一首(餘不盡錄)

太虛石洞居。孤絕少人依。遠客携琴至。逢師乞食歸。一蒲青草上。四面白雲飛。盡日無言說。巖華落滿衣。

### 考誌

江都寶勝寺。唐貞觀年間。僧智端啟建於揚子橋。國朝江水[土\*冊]沒。揚州衛指揮李鎧。僧太虛。遷於城東三里。今云寶城。無考。疑即寶勝。侯再詳。  
法華大意卷下

### No. 609-C 法華大意後序

金陵太虛相師。昔與陳白沙章定山諸老先生相友善。既多論述。及見孝宗皇帝復有講章詩篇。若雜文諸稿。維揚士大夫家有藏之者。今不易得也。涓孩時舍名稱師兄者玉北菴。往歲閉關龍南精舍。適

鄉人李君良忠過訪。為玉兄道其兄梅峰居士遊維揚時。登太虛樓。訪師所遺。得法華大意本於住僧(某)而歸。玉兄後三年出關。復得是本於王龍溪先生所。而本固缺後三品。適玉兄之師玉芝大師至自武康。足成之。玉兄受之。遂較刻以廣其傳。為卷凡三。字七萬。布施者若干人。費銀若干兩。工再月而成。既成而玉兄持本以來。令涓序其來歷如此。若夫要旨所關。已標指於前序中。雖然如聞六祖之言心悟轉法華。心迷法華轉。然則經且不可恃也。而況於區區之大意。此在眾生誦讀者當自得之。其無以義為讐。以負於著者藏者訪者足者施者刻者之心。

嘉靖丁巳歲冬十二月望日山陰徐渭撰

### No. 609-D 重刻太虛禪師法華大意跋

乙丑春。湛然大師說法於海鹽。余往瞻覲。時常隨雲集約千眾。柱石梁公率大眾向余作禮。出此大意相囑。余刻華嚴疏鈔功尚未竣。辭。公等切懇。唯唯承當。携至舟中。寓目數行。見其引太極中庸等語。懼為狂慧誤解者之嚆矢。尚懷猶豫。及再讀之。合掌敬仰。知師的的見大意。蓋不以文字詮釋法華經。直以法華經為自心註脚者。伶俐漢子見之。便可悟入。急當重較流通無疑矣。遂授之梓以作後人眼目。至其稱引儒家言。亦一時為陳白沙諸老方便。觀者勿竊影響。徒滋混濫以資齒頰。使自誤誤人。墮落不淺。若夫得意忘言者。信知一切世諦文字。無不從法界流出。無障無礙為一味法。余言特饒舌耳。

天啟丁卯仲春八日長水葉祺胤識

---

## [CBETA 贊助資訊](#)

(<https://www.cbeta.org/donation/index.php>)

自 2001 年 2 月 1 日起，CBETA 帳務由「財團法人西蓮教育基金會」承辦，並成立「財團法人西蓮教育基金會」－ CBETA 專戶，所有捐款至 CBETA 專戶皆為專款專用，歡迎各界捐款贊助。

您的捐款本協會皆會開立收據，此收據可在年度中申報個人或企業的綜合所得稅減免。感恩諸位大德的善心善行，以及您為佛典電子化所做的一切貢獻。

---

## 信用卡線上捐款

本線上捐款與聯合信用卡中心合作，資料傳送採用 SSL (Secure Socket Layer) 傳輸加密，讓您能夠安全安心地進行線上捐款動作。

## [前往捐款](#)

---

## 信用卡（單次 / 定期定額）捐款

本授權書可提供單次捐款或定期定額捐款之用途。

請於下載並填妥捐款授權書後，請傳真至 02-2383-0649，並請來電 02-2383-2182 確認。

或掛號寄至 10044 台灣台北市中正區延平南路 77 號 8 樓 R812 財團法人西蓮教育基金會收。

請在此下載 [授權書](#) (MS Word 格式)

---



## 劃撥捐款

郵政劃撥帳號: 1 9 5 3 8 8 1 1

戶名: 財團法人西蓮教育基金會

欲指定特殊用途者, 請特別註明, 我們會專款專用。

---

## 線上信用卡 / PayPal 捐款

PayPal 是一個跨國線上付款機制的公司, CBETA 引用其服務, 提供網友能在線上使用信用卡或 PayPal 帳戶贊助 CBETA 。

PayPal is an online system of a global payment solution. CBETA uses its service to provide the uses to donate by using the credit cards or PayPal account to support the CBETA project.

相關收據開立事宜, 由於付款幣別為美元, 我們除了會依您所贊助之美元金額開立收據外, 另我們會依捐款當日公告匯率開立台幣收據, 此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

[線上信用卡 / PayPal 贊助](#)

---

## 支票捐款

支票抬頭請填寫「財團法人西蓮教育基金會」。

CBETA is part of Seeland Educational projects, any donation (ex- cheques, remittance, etc.,) please entitle to "The Seeland Education Foundation".

---